



List Saveza lovačkih društava Tuzlanskog kantona

Lovac

Broj 58

Tuzla, juni/lipanj 2013.

Cijena 1,00 KM



Dobar pogled na srndaća



Lovac

List Saveza lovačkih društava
Tuzlanskog kantona

Izlazi tromjesečno

Izdavač:
Predsjedništvo Saveza lovačkih društava
Tuzlanskog kantona

Za izdavača:
Rasim Omerović,
predsjednik Predsjedništva SLD TK

Redakcija lista "Lovac":
Rasim Omerović (Kalesija),
Zvonko Gusković (Tuzla),
Šerif Bečić (Banovići),
Hasan Muratović (Zivinice),
Hazim Smajlović (Sapna),
Muris Mujedinić (Srebrenik),
Sead Mehulić (Gradačac),
Hajrudin Imširović (Teočak),
Hariz Salihović (Kladanj),
Džemal Jukan (Gračanica),
Mujo Softić (Lukavac),
Sulejman Hadžić (Doboj-Istok) i
Hazim Mujkić (Čelić).

Glavni i odgovorni urednik:
Rasim Omerović, dipl. ing. šumarstva

Urednik i lektor:
Prof. Mirzet Ibrišimović

Stručni saradnik:
Jasmin Bećirović, profesor

Fotoliti:
B Concept Sarajevo

Priprema i štampa:
"Mikroštampa" Tuzla

Za štampariju:
Šaban Cipurković

Adresa redakcije "Lovac"
Tuzla, Džindić mahala 13.
Tel./fax: 035/277-525
Web site: www.lovacltk.com
E-mail: info@lovacltk.com

Račun kod Tuzlanske banke d.d. Tuzla
132-100-03092192-27

Na osnovu mišljenja Ministarstva
za obrazovanje, nauku, kulturu, sport
i informisanje Vlade TK broj
10/1-452-25-2/98 od 28. 08. 1998. god.,
list „Lovac“ oslobođen je dijela
poreza na promet

Komisija za lovno streljaštvo

Kantonavno natjecanje u trap disciplini



Većina članica Saveza lovačkih društava Tuzlanskog kantona popularizira lovno streljaštvo sudjelovanjem u godišnjem natjecanju u gađanju glinenih golubova – trap disciplini. Kao i do sada, natjecanje se održalo u tri kola, ali samo u Tuzli jer je tuzlansko streljiste Pašabunar jedino koje ima bunker s automatskim bacačem glinenih golubova, kao i ostale uvjete koji su potrebni da bi se ovo natjecanje moglo održati na primjeren način. S obzirom na situaciju, odaziv ekipa udruženja je bio dobar. Kao i svake godine, nastupili su takmičari iz Srebrenika, Gradačca, Tuzle, Gračanice i Čelića. Natjecanje je tradicionalno održano u sportskom i lovačkom duhu, uz lijepo druženje i fair play. U tri kola natjecalo se gađanjem 150 letećih meta i dodatnih 25 meta za prvoplasiranih šest strijelaca.

Postignuti su sljedeći ekipni i pojedinačni rezultati:

Ekipno: 1. LD „Tuzla“ I Tuzla 316 pogodaka, 2. LD „Tuzla“ Tuzla II 307 pogodaka i 3. LD „Jelen“ Gradačac 287 pogodaka.

Pojedinačno juniori: 1. Nedžad Gačević 126 pogodaka, 2. Severt Šehović 125 pogodaka, 3. Armin Jašarević 122 pogodaka, 4. Jozo Kaldrmdžić 120 pogodaka, 5. Dragan Filipović 114 pogodaka i 6. Muhibija Buljubašić 109 pogodaka.

Pojedinačno seniori: 1. Toni Kovačević 122 pogodaka, 2. Igor Kovačević 118 pogodaka i 3. Ajdin Šljivić 91 pogodak.

Po završenom natjecanju određena je ekipa za državno prvenstvo: Nedžad Gačević, Severt Šehović i Armin Jašarević. Nakon dodjele pehara, medalja i diploma najboljim ekipama i pojedincima, nastavljeno je lovačko druženje uz svečani ručak na streljstu Pašabunar.

Nikola Kovačević



Godišnja Skupština SLD TK

Preduzeti sve da članice Saveza ispune uslove za dodjelu koncesija gospodarenja lovištima

U prostorijama Lovčkog društva „Tuzla“, 17. maja 2013. godine, održana je redovna godišnja Skupština SLD TK. Skupštini je prisustvovalo 33 od ukupno 37 delegata, predsjedavao je Rasim Omerović, dipl. ing. šumarstva-predsjednik SLD TK, a zapisnik je vodio Jasmin Bećirović, prof.-sekretar SLD TK.

Dnevni red sjednice je imao sedam tačaka. Jednoglasno su usvojeni izvještaji o radu Saveza LD TK, Savjeta za lovstvo, Savjeta za lovnu kinologiju, Komisije za streljaštvo - organa Saveza, za 2012. godinu, kao i Plan rada SLD TK za 2013. godinu. Rasim Omerović, predsjednik SLD TK, istakao je da će se Svez u narednom periodu još više angažirati na razvoju lovstva i obnovi lovišta i da će se sve preduzeti da članice Saveza ispune uslove za dodjelu koncesija gospodarenja lovištima (divljači).

Razmatran je i usvojen Izvještaj o finansijskom poslovanju SLD TK za 2012. godinu. Istaknuto je da je Savez u izvještajnom periodu namjenski i pravilno poslovao. Dževad Mehić, predsjednik Nadzornog odbora, istakao je i konstatovao da su novčana sredstva u 2012. godini namjenski trošena,



da nije bilo značajnih odstupanja od Plan prihoda i rashoda za 2012. godinu, odnosno da je ostvaren višak prihoda u odnosu na rashode. Razmatran je i usvojen Plan prihoda i rashoda za 2013. godinu.

Usvojene su i određene sugestije kod izmjene Operativnog kalendara aktivnosti u lovištima TK za 2013./14. godinu, kojeg je nedavno usvojilo Predsjedništvo SLD TK.

Odlučeno je da Komisija za priznanja i odlikovanja razmatri Pravilnik o priznanjima i odlikovanjima, kako bi Komisija Predsjedništvu a Predsjedništvu Skupštini SLD TK dostavila prijedloge izmjene ovog Pravilnika.

Takođe, delegati Skupštine su odlučili da Savjet za lovstvo resornom Ministarstvu TK uputi dopis za produženje roka za vađenje oružanih listova i da se pokuša ukinuti ljevakarsko uvjerenje za lovce koji imaju oružani list.

Jasmin Bećirović
sekretar SLD TK





11. lukavački međunarodni sajam turizma, lova i ribolova - LIST 2013

U Lukavcu je od 9. do 11. maja 2013. godine održan 11. lukavački međunarodni sajam turizma, lova i ribolova (LIST 2013), jedini specijalizirani sajam turizma u Federaciji BiH. Organizator je bio Lukavački Sajam, uz podršku Ministarstva okoliša i turizma Federacije BiH i Vlade Tuzlanskog kantona, a suorganizatori su bili Općina Lukavac i Turistička zajednica Tuzlanskog kantona.

I ovogodišnja turistička ponuda je bila utemeljena na prirodnim ljepotama, lovnom i eko-etno turizmu i bogatstvu tradicijskih i kulturoloških različitosti. Na oko 2.000 m² zatvorenog prostora u velikoj lukavačkoj sportskoj dvorani i 1.000 m² otvorenog sajamskog prostora, preko 12.000 posjetilaca je imalo priliku vidjeti široku ponudu 128 izlagača iz Bosne i Hercegovine, Hrvatske, Srbije, Crne Gore, Makedonije, Turske, Albanije, Italije, Mađarske i Njemačke.

Ulogu domaćina i organizatora svečane večere preuzela je Općina Barleban iz Njemačke, koja petu godinu zaredom sudjeluje Lukavačkom sajmu, a ove godine, njihovu delegaciju, osim poslovnog kora, činili su i plesne grupe i akrobati koji



su tokom sajamskih dana animirati izlagače i posjetioce sajma i tako bh. stanovništvu približili kulturu i turističku ponudu svoje zemlje.

Sajam je objedinio cjelokupnu turističku ponudu TK i BiH i bio prilika za sticanje novih kontakata i razmjenu kvalitetnih ideja, kao i za globalni pristup turističkom tržištu i ciljanom marketingu prema domaćim turističkim destinacijama. Promoviranje i afirmiranje autentičnih i autohtonih bh potencijala odvijalo se kroz lovni, eko-etno, gastro, planinski, avanturistički, vjerski i banjski turizam, dakle bogat kulturno-zabavni program kao sastavni dio turističke ponude i potražnje, opreme za lov i ribolov, ponude sportske i ugostiteljske opreme, oružja i municije uz svo bogatstvo mirisa i okusa tradicionalne bosanskohercegovačke kuhinje. Uspješno su se predstavili hoteli, turističke agencije, restorani, udruženja zdrave hrane, lovačka udruženja, Asocijacija organskih proizvođača, samostalne zanatske radnje, proizvođači meda, mliječnih proizvoda i proizvođači rukotvorina. Prisutan je bio i Savez lovačkih društava TK sa svojim potencijalima i eksponatima, odnosno posebnu pažnju je privukao štand LD „Svatovac“ Lukavac. U tri dana bogatih sajamskih manifestacija organizirane su razne edukacijske promocije, savjetovanja, stručno-pokazna vinska radionica, regionalna konferencija organsko-ekoloških proizvođača, festival hrane i pića, novinarska kotlićijada. Posebnu pažnju su imali okrugli stolovi: *Lovište Tuzlanskog kantona i koncesija, Starinsko bosansko kulinarsko iz kulturološke perspektive i Razvoj eko-turizma na području Tuzlanskog kantona, potencijali i prednosti.*

Organizatori navode da su dosadašnja iskustva pokazala da manifestacije poput ove lukavačke mogu biti i pokretači razvoja turizma određene države/regije, jer kroz njih moderni turista na zabavan način stiče nova iskustva i upozna je manje poznate kulture.

Savez lovačkih organizacija Tuzlanskog kantona je u okviru Sajma organizirao OKRUGLI STO na temu: *Koncesije na lovišta Tuzlanskog kantona – Dodjela lovišta na gazdovanje i pripreme podataka za izradu lovno-privrednih osnova.*

Predavači su bili inženjeri šumarstva: Rasim Omerović, Senad Selimbašić i Seid Čorbić. Prisutne na Okruglom stolu je pozdravio Mujo Softić, predsjednik LD „Svatovac“ Lukavac. Predavači su stručno, koncizno i sveobuhvatno obradili temu s posebnim akcentom na činjenicu da su i u Ministarstvu poljoprivrede, šumarstava i vodoprivrede TK svjesni činjenice da se, prilikom primjene Zakona o koncesijama, mora uvažiti i favorizirati dosadašnje iskustvo lovačkih udruženja u gazdovanju lovištem: izgrađena infrastruktura lovno-uzgojnih i lovno-tehničkih

objekata u lovištu kao i broj članova budućih korisnika ovog javnog dobra a radi zadovoljenja širih općekorisnih, socioloških funkcija lovišta, što je utemeljeno na tipovima formiranih lovišta (privredno-sportska lovišta). Svojevremeno je i Edin Ajanović, ministar poljoprivrede, vodoprivrede i šumarstva u Vladi TK, istakao „da su lovačka udruženja koja gazduju tim prostorima veoma kvalitetno vršili zaštitu šuma, kao jednog od najvećih resursa u Kantonu. Lovačka društva, uz činjenicu da održavaju lovišta, prehranjuju divljač i paze na zakonit i sportski lov, predstavljaju okosnicu razvoja lovno turizma u našem Kantonu. Osim toga, lovci su prvi koji dojavljaju u slučaju nekih elementarnih nepogoda, i prvi koji gase vatru u slučaju požara, koji su sve češći za vrijeme ljetnih suša. Na području Tuzlanskog kantona djeluje 13 lovačkih društava. U lovnom turizmu Tuzlanski kanton ne zaostaje za najbogatijim svjetskim lovištima, niti po kvantitetu niti po kvalitetu divljači, što je očito i prema broju lovačkih društava koja egzistiraju na području TK“.

Uostalom, kako bi se riješio problem statusa lovišta na području TK, predstavnici resornog Ministarstva TK, SLD TK i Komisije za dodjelu koncesija, tek nakon ovog konstruktivnog sastanka su donijeli zaključak o raspisivanju javnog poziva za dodjelu koncesija gospodarenja lovištima (divljači), u skladu sa Zakonom o koncesijama FBiH, Pravilnikom o uslovima gospodarenja lovištima i Pravilnikom o načinu određivanja i obilježavanja granica lovišta u FBiH. Taj nedavni sastanak je razriješio i neke zakonske prepreke koje su ograničavale prostor koncesiji.



Predavači su naglasili da se ima u vidu da se na gazdovanje daju lovišta, odnosno divljač kao državno vlasništvo i dobro od općeg interesa, i da se organizacija lovstva i lovišta, uzgoj, zaštita, lov i korištenje divljači precizira izradom lovno-privredne osnove, a koju svako lovačko društvo obavezno izrađuje u roku od jedne godine nakon dobijanja koncesija (najmanje na 10, a najviše na 30 godina)



gospodarenja lovištima (divljači). Lovno-privredna osnova će morati biti usklađena s dugoročnim programom razvoja poljoprivredne proizvodnje, šumsko-privrednom osnovom za površine na kojima se lovište nalazi, vodoprivrednom osnovom, prostornim planom i ratificiranim međunarodnim ugovorima iz oblasti lova, zaštite prirode i prirodnih staništa divljači.

Jasmin Bećirović
sekretar SLD TK

Lovačko društvo „Tuzla“ Tuzla Prihranili divljač i izgradili čeku



Čaklovičani iz LS „Simin Han“ - LD „Tuzla“, dosta su truda uložili u prihranu divljači kroz unošenje hrane, izgradnju hranilišta, pojilišta i solišta, a zahvaljujući ideji i sredstvima mladog grupovođe iz Čaklovića, Rasim, Mehmed, Baksuz, Ibro, Menso, Edo, Ake, Tado i Zoka, izgradili su čeku u Čaklovićima, na njivi zvanoj Bara.

Tado



Lovačko društvo „Tuzla“ Tuzla

Uspješno prihranjivanje divljači

Lovačka grupa „Stari hrast“, na terenu Tunčadolovi, gdje je prošle godine pušteno oko četrdeset koka fazanske divljači, za vrijeme januarskih većih sniježnih padavina, izvršila je prihranjivanje divljači. Kukuruz u klipu je doniranim od lovaca Grupe: Kovačević Faika, Krdžalić Vahidina i Malkočević Hamde. Lovac Malkočević Hamdo je obezbijedio sijeno za srneću divljač, so je obezbijedena od LD „Tuzla“. Akciju prihrane niske i visoke divljači izveli su lovci: Malkočević Mehmed, Malkočević Džemal, Malkočević Sanel Muštika, Bajrić Adnan, Malkočević Hamdo, Kovačević Faik, Šekcanović Husein i Kovačević Amel, mladi lovac pripravnik. Isti lovci su tom prilikom izveli i akciju uništavanja štetočina-pasa lualica (4).

Husein Šekcanović



Lovačko društvo „Tuzla“ Tuzla Božina lovačka čeka

Ova lijepa čeka na fotografiji je djelo novca i ruku lovca Bože Perića, dopredsjednika Sekcije „Dobrnja“-LD „Tuzla“. Uz uputstva matičnog Društva čeku je izgradio sam ali za potrebe svih svojih lovaca. Ova čeka u srcu lovišta tek je jedan u nizu lovnih objekata i projekata u kojima je Božo Perić uzeo učešće. Njegova spremnost da se odazove svim akcijama koje organizira i realizira LD „Tuzla“ najbolji je pokazatelj Božine privrženosti lovstvu i lovcima.

Husnija Kišić



Lovačko društvo „Tuzla“ Tuzla- Lovac pola vijeka

Rijetko se čuje da je neki lovac „nabrao“ pola vijeka lovovanja, a naš Mehmed Sinanović je upravo član LD „Tuzla“-LS „Dobrnja“ od 1962. godine. Za više od pedeset godina lovačkog staža, Mehmed je ostavio upečatljiv trag među lovcima regije kao veoma aktivan, služeći kao uzor i primjer kako treba poštovati lovačke obaveze i običaje. Bio je na mnogim funkcijama, a za zalaganje u razvoju i afirmaciji lovstva dobitnik je mnogih priznanja, među kojima treba istaći da je proglašen počasnim članom. Meho je, hvala Bogu, još uvijek aktivan lovac, a želimo mu da još dugo poživu među nama.

Husnija Kišić



Četvrta redovna Skupština

Četvrta redovna Skupština LD „Srndać“ Gračanica, kojom je predsjedavao Džemal Jukan, predsjednik Društva, uz Radno predsjedništvo: Hasan Ibrišević i Nezir Kovačević, izvršila je analizu i ocjenu jednogodišnjeg rada organa, komisija i drugih radnih tijela Društva, usvojivši i izvještajna dokumenta za lovnu 2012./13. godinu. Nakon usvajanja izvještaja, Skupština je donijela Plan prihoda i rashoda za

lovnu 2013., Plan rada LD „Srndać“ za lovnu 2013./14. i Godišnji plan gospodarenja LD „Srndać“ za lovnu 2013./14. Prilikom donošenja ovih planskih dokumenata, Skupština se rukovodila pozitivnim iskustvima i dostignućima dosadašnjeg rada i ispunjavanja obaveza Društva, u skladu sa Zakonom lovstvu FBiH i Statutom LD „Srndać“ Gračanica.

Tajib Omerović



Treće međusekcijsko takmičenje u gađanju glinenih golubova

Treće međusekcijsko takmičenje u gađanju glinenih golubova LD „Srndać“ Gračanica je organizovalo na platou ispred lovačke kuće na Visu. U ekipnom takmičenju I mjesto je osvojila LS „Gračanica“ I (Armin Jašarević, Ibrahim Džikić i Sanel Čajić), II mjesto je zauzela LS „Vranovići“ (Ramo Zekić, Midhat Zekić i Emsad Zukanović) dok je III mjesto pripalo LS „Miričina“ (Damir Okanović, Damir Kurtović i Kenan Ibrahimović). U pojedinačnoj konkurenciji redoslijed je sljedeći (na fotografiji): I mjesto Ramo Zekić (LS „Vranovići“), II mjesto Armin Jašarević (LS „Gračanica“ I) i

III mjesto Midhat Zekić (LS „Vranovići“). Najbolji strijelac Ramo Zekić, šumarski tehničar, ima 22 godine, lovac je od 2004., profesionalno obavlja dužnost lovočuvara u Društvu i sin je Midhata Zekića koji je zauzeo III mjesto.

Ovo takmičenje je ispunilo cilj: podizanje nivoa obučenosti lovaca u rukovanju lovačkim oružjem (posebno lovaca pripravnika), njegovanje lovne etike, odabir lovaca i ekipa za gađanje pokretnih meta na višim nivoima takmičenja i, dakako, druženje lovaca.

Tajib Omerović



Proljetno prebrojavanje pokazalo povećanje brojnosti lovne divljači



U nedjelju, 10. marta ove godine, LD „Srndać“ Gračanica je organizovalo redovno proljetno prebrojavanje divljači u lovnim jedinicama Šamunica i Kruškov dol. U akciji je učestvovalo 350 lovaca iz svih lovačkih sekcija, a najbrojniji su bili iz sekcija „Gračanica I“, „Pribava-Lohinja“, „Gračanica II“, „Lukavica“, „Gornja Orahovica“, „Malešići“, „Soko“, „Džakule“ i „Trnovci“. Okupljene lovce ispred lovačke kuće Pijesak pozdravio je Džemal Jukan, predsjednik LD „Srndać“ (na fotografiji). Zahvalivši se lovcima što su se odazvali ovogodišnjoj akciji prebrojavanja divljači, predsjednik Jukan je prisutnima dao osnovna uputstva za uspješno prebrojavanje. Akcijom je rukovodio Izet Šerbečić, glavni lovovođa Društva, u saradnji sa predsjednicima i lovovođama sekcija. Prebrojavanje je obavljeno metodom primjernih ploha, kao jednom od najpouzdanijih i najčešće korištenih za utvrđivanje brojnog stanja sitne divljači. Prije postavljanja primjernih ploha utvrđena je ukupna veličina staništa za ovu vrstu divljači u okviru lovišta, radi određivanja odgovarajuće veličine primjernih ploha u različitim

tipovima staništa. Primjerne plohe su postavljene u najpreglednije dijelove lovišta. Nakon prebrojavanja, podaci sa svih primjernih ploha su dostavljeni Komisiji za lovstvo LD „Srndać“. Članovi Komisije su izvršili cjelovitu analizu aktivnosti i dobijene rezultate preračunali na površinu određenog tipa staništa, a zatim izračunali ukupan broj divljači na području cijelog lovišta Društva. Obradene podatke s ovogodišnjeg proljetnog prebrojavanja divljači Komisija za lovstvo će ugraditi u Godišnji plan gospodarenja lovištem za lovnu 2013./14. godinu i na osnovu toga će sačiniti Plan korištenja lovno-uzgojne divljači u predstojećoj lovnj sezoni. Obradjeni podaci s posljednjeg prebrojavanja divljači pokazuju da se broj divljači povećao u odnosu na prošlogodišnje prebrojavanje, posebno srnce, zečije i crne divljači.

Nakon prebrojavanja nije izostalo veselo druženje uz svirku na harmonici lovca Suada Čamdžića (na fotografiji).

Tajib Omerović

Revir IV na prebrojavanju divljači

U sklopu redovnih planiranih aktivnosti LD „Majejica“ Srebrenik, lovci Revira IV su uspješno izvršili proljetno prebrojavanje divljači. Ova zakonska obaveza je obavljena 3. marta, uz učešće 52 lovca i oko 10 pomoćnika i pripravnika. Organizacioni odbor ispred Revira IV, u sastavu Zehrudin Muratović (lovovođa Revira), Edin Herceg (predsjednik Revira), Petar Topalović i Mihret Muratović su ocijenili da je prebrojavanje proteklo veoma uspješno, prije svega zbog solidnog odziva učesnika, iskazane

ozbiljnosti i stručnosti te zadovoljavajuće brojnosti divljači u lovištu. Na terenu na kojem je vršeno prebrojavanje utvrđeno je prisustvo ovih vrsta: od visoke divljači - srnce divljač, od pernate divljači - fazanska divljač i šljuka, od sitne divljači - zec, od dlakavih grabežljivaca - lisica, a evidentan je broj škanjca mišara, jastrijeba i kreje. Nakon prebrojavanja je upriličen i lovački ručak i druženje za sve učesnike.

Predsjedništvo Revira IV



Seminar stručnog osposobljavanja

Realizirajući planove rada, Predsjedništvo LD „Vjetrenik-Šibošnica“ Čelić, u prostorijama motela „Rojal“ u Čeliću, organizovalo je seminar stručnog osposobljavanja za članove Društva, kome se odazvalo oko 120 lovaca. Teme su bile: planiranje u lovištu, lovučarska služba i lovačka etika i običaji, a predavači su bili Senad Selimbašić i Seid Čorbić, oba inženjeri šumarstva i članovi Savjeta za lovstvo SLD TK. Posebno intresovanje je pobudila treća tema, u vezi koje su predavači naglasili značaj obaveznog poštivanja lovačkih običaja i etike koja treba da krasi identitet svakog lovca.

U sklopu seminara je organizovana izložba lovačkih trofeja odstrijeljenih u lovištu Društva od 2000. godine do sada. Komisija za ocjenu trofeja LD „Vjetrenik-Šibošnica“, u sastavu: Semir Mehanović, Salih Karamović, Ahmet Bešić i Asif Kešetović, svojevremeno su obišli sve sekcije i ocijenili trofeje, utvrdivši da je odstrijeljeno 10 trofejnih srndača. Četiri srebrena su odstrijelili Salih Karamović, Nedžad Gačević, Ibrahim Smajić i Omer Fejić, dok su šest bronzanih odstrijelili Husejn Livadić, Šaban Kovačević, Miro Knežević, Senahid Latifović, Senad Ahmetović i Šefik Bajrić. Trofej (kljove) vepra, kojeg je odstrijelio Šaban Kovačević, Komisija je ocijenila zlatom.

Nakon stručnog seminara i obilaska izložbe lovačkih trofeja, organizovano je druženje uz lovački gulaš. Pohvale organizaciji



seminara i izložbe od strane predavača, starijih lovaca i mnogih drugih, doprinjele su zaključku da se sve sugestije iskoriste i za organizaciju sličnog seminara i izložbe i naredne godine, uz dopunu tema koje bi obuhvatile oblast kinologije i bolesti divljači koja naseljava LD „Vjetrenik-Šibošnica“ Čelić.

Komisija za informisanje
LD „Vjetrenik-Šibošnica“ Čelić



Zaustavimo krivolov i lovokradu

Lovište LD „Vjetrenik-Šibošnica“ Čelić u posljednje dvije godine je zapalo za oko krivolovcima i lovokradicama kako iz našeg okruženja tako i iz drugih društava. Iako je Predsjedništvo Društva na nekoliko sjednica raspravljalo o ovom problemu i preduzimalo mjere na suzbijanju krivolova i lovokrade, ipak su pojedinci iz našeg udruženja i susjedstva pokušali da love „na crno“. Međutim, zahvaljujući aktivnostima odgovornih ljudi mnoge nelegalnosti su presječene a neodgovorni su izvukli debliji kraj. Tačnost ovih tvrdnji ilustruju neke otkrivene i sankcionisane aktivnosti krivolovaca i lovokradica:

Dvadesetog decembra 2011., ne granici lovišta između LD „Vjetrenik-Šibošnica“ i LD „Majejica“ Lopare, u rejonu zvanom Dobra Voda, udaljenom od Čelića oko 2 km u pravcu Lopara, lovučvari LD „Majejica“ su uhvatili tri krivolovca kako gule odstrijeljenog srndača. U ovoj grupi su bili po jedan lovac iz našeg Društva i po jedan iz Maoče i Brčkog.

Osamnaestog decembra 2012., u lovištu LS „Humci“, od strane pomoćnog lovučvara, lovučvara i lovovođe LD „Vjetrenik-Šibošnica“, uhvaćen je lovokradica, koji je tom prilikom iz prepravljene puške M-48 odstrijelio divlju svinju od oko 80-tak kilograma. Lovokradu je učinila osoba rodom iz Humaca, nastanjena na području Brčko Distrikta.

I na kraju, bez nabiranja manjih nedjela, 22. februara 2013. godine, u večernjim satima, trojica lovokradica porijeklom iz Humaca, također nastanjeni u Brčkom, odstrijelili su smeću divljač u blizini Jablanice, u neposrednoj blizini granice lovačkih društava iz Čelića i Lopara. Sva trojica su od strane lovačke službe iz LD „Majejica“ Lopare uhvaćeni na licu mjesta i predati na procesuiranje nadležnim institucijama. U vezi s navedenim, treba napomenuti kako su disciplinski organi i Predsjedništvo LD „Vjetrenik-Šibošnica“ dvojici članova našeg Društva, zbog krivolova, izrekli disciplinsku mjeru isključenja iz Društva.

I pored toga još ima lovaca u našem Društvu koji se ponašaju kao da je divljač njihovo vlasništvo a ne prirodno bogatstvo u vlasništvu države. U cilju suzbijanja pomenutih i sličnih negativnosti, ubijeđen da ovakvih pojava ima i u drugim članicama SLD TK, smatram da treba pokrenuti inicijativu da se imena i prezimena krivolovaca i lovokradica, na nivou Saveza, objave u našem listu LOVAC, na web stranici Saveza i drugim medijima. Na taj način bi se postigli uspjesi na planu prevencije i suzbijanja krivolovstva i lovokrade u mnogim članicama Saveza pa i u širem okruženju. Ubijeđen sam da samo zajedničkim snagama i dosljednom primjenom Zakona o lovstvu možemo suzbiti krivolov i lovokradu i stvoriti mladim lovcima i budućim naraštajima uslove za bolje sutra.

Hazim Mujkić

Lov za prijatelje Društva



U organizaciji Predsjedništva LD „Vjetrenik-Šibošnica“ Čelić, sredinom januara ove godine, priređen je lov na divlje svinje za prijatelje Društva. Jutarnje okupljanje je bilo u lovištu LS „Šibošnica“, na lokalitetu Žunovo, gdje je prisutne pozdravio Faruk Mehanović glavni lovovođa, poželivši uspješan lov, dok je Miro Knežević, lovovođa Sekcije „Šibošnica“, upozorio lovce na oprez i mjere sigurnosti. Čeke je postavio Hazim Zukanović, a pogon

je povjeren Senadu Deliću, kome su pomogli Nedžad Gačević i Salih Karamović zv. Karam. Svinje su zaobišle čeke, pucnji su bili uprazno, ali to nije smetalo da se ovo druženje nastavi uz zajednički ručak ispod lovačke nastrešnice na Žunovu. Načelno je dogovoreno naredno okupljanje, uz želju da lov bude uspješniji.

Komisija za informisanje
LD „Vjetrenik-Šibošnica“ Čelić



Prvo ocjenjivanje lovačkih trofeja

Novoformirana Komisija za ocjenjivanje lovačkih trofeja, u satavu Nikola Kovačević, Džafer Mehanović, Zoran Meh, Haris Muratović, Amir Sinanović i Dragan Filipović, zajedno sa stručnim saradnikom dipl. ing. Sidom Čorbićem, u prostorijama LD „Tuzla“, izvršila je prvo ocjenjivanje lovačkih trofeja u povijesti LD „Tuzla“. Trofeji srndača iz prethodne dvije lovne godine, ocijenjeni su kao perspektivni, ali ne u medalji. Trofej vepra, čiji je vlasnik Džemal Sadiković, Komisija je ocijenila visokim zlatom.

Komisija za ocjenjivanje lovačkih trofeja



Nezapamćeno lovačko sijelo

U Stuparima, krajem marta ove godine, u novoizgrađenom restoranu „Napoleon“, vl. lovca Hodžić Nedžada iz Prijanovića, u povodu završetka 2012. i početka 2013. lovne godine, organizovano je nezapamćeno lovačko sijelo. Sijelu je prisustvovao veliki dio lovaca Sekcije „Stupari“-LD „Sokolina“ Kladanj, predstavnici javnog, političkog, kulturnog života, neki građani akademske zajednice, kao i predstavnici većeg broja privatnih preduzeća koja imaju sjedište na području općine Kladanj. Sijelu je prisustvovala i delegacija LD „Majejica“ Srebrenik, na čelu sa Mujčinović Safetom, koji je i član LD „Sokolina“. Svi kapaciteti restorana su bili popunjeni do posljednjeg mjesta. Od početka lovačkog sijela prisutne je zabavljao četveročlani orkestar koji je svirao po željama, od narodne, zabavne do izvorne muzike. Na početku sijela prisutnima se obratio Mujčinović Safet, koji je bio dugogodišnji aktivni član Lovne grupe „Prijanovići“, pojasnivši razloge okupljanja i istakavši akcije i zasluge

pojedinih lovaca koji su bili nosioci aktivnosti, a odao je priznanje i lovcima koji su preminuli. Sve je oduševio bogat izbor i kvalitet jela i pića po nabavnim cijenama, iz kuhinje „Napoleona“. Sijelo je trajalo od akšama do sabaha i proteklo je bez ijednog incidenta, uz neprekidnu pijesmu i igru. Po završetku sijela gosti su uz muziku ispraćeni sve do svojih automobila, uz obećanje da će neisostavno doći i duće godine, ne štedeći riječi hvale na gostoprinstvu. Da sve protekne u najboljem redu pobrinuo se jedan broj članova Organizacionog odbora sijela, kao što su Hodžić Nedžad, Musić Fadil, Sarajlić Senad, Kadrić Halim, i još neki drugi lovci koji nisu članovi Odbora. Poruka s ovog lovačkog sijela je da će lovci Grupe „Prijanovići“ održati tradiciju druženja i okupljanja, kako lovaca tako i drugih građana s prostora Kladnja i šire.

Mujaga S. Mešanović,
dopredsjednik LS „Stupari“-LD „Sokolina“ Kladanj

Godišnja Skupština LD „Sokolina“ Kladanj

Općina Kladanj prepoznatljiva po svom uzornom lovačkom društvu

U prostorijama Lovачkog kluba je održana 20 redovna, godišnja, izvještajna Skupština LD „Sokolina“ Kladanj, kojom je predsjedavalo Radno predsjedništvo: Hariz Salihović, predsjednik LD „Sokolina“ i članovi Salko Halilović i Hariz Šarić. Delegati



su, nakon usvajanja 10 tačaka dnevnog reda, razmatrali i usvojili sve prezentirane izvještaje. Izvještaj o radu Društva za proteklu godinu je podnio njen predsjednik Hariz Salihović, koji je naglasio da su se i pored niza teškoća uspješno realizirali svi zacrtani planovi. Lovište je znatno obogaćeno muflonima i jelenima. Pored izuzetno velikog snijega, velikim naporima lovaca, hrana se nosila na hranilišta tako da je divljač opstala. Kako je naglasio Salihović, i ubuduće će permanentni cilj biti zaštita divljači i stalno obogaćivanje lovišta sa atraktivnom i kvalitetnom lovnom divljači. U izvještaju glavnog lovovođe Hamida Selimbašića, posebno je

aktualizirano pitanje pasa lotalica, koji gotovo svakodnevno čine štete u lovištima. Senad Selimbašić, član Kantonalnog savjeta za lovstvo, naglasio je da se mora poštivati Zakon o zaštiti životinja i da je, isto tako, Zakonom o lovstvu predviđena obaveza da su svi lovci dužni uklanjati pse i mačke iz lovišta, ali na namanje 300 metara od naseljenog mjesta. Problem jeste veliki, ali u Društvu su odlučni da u skladu sa Zakonom konačno riješe ovaj problem.



Delegati Skupštine su još jednom pokazali puno jedinstvo u namjeri unapređivanja lovstva na Općini i šire, ali i jačanju samog Društva, jer je Kladanj već nadaleko poznat po svojim lovcima i bogatim lovištima.

Fuad Berkovac

Lovačko društvo „Sokolina“ Kladanj

Lovište bogato sa divljači



Lovačko društvo „Sokolina“ Kladanj je jedno od rijetkih koje je u svom lovištu sačuvalo i poboljšalo brojno stanje i kvalitet divljači. Isto tako, jedno je od rijetkih koje se uspješno bavi uzgojem jelena lopatara, muflona i divljeg zeca. Kroz planove gazdovanja, Društvo je čak uspješno sačuvalo divokožu, kao jednu od rijetkih vrsta divljači na našim prostorima. U posljednje vrijeme je zabilježen i povećan broj ove atraktivne lovne divljači.

Druuga fotografija svjedoči da je lovište LD „Sokolina“ bogato i kvalitetnom crnom divljači. Na njoj su lovci Sekcije „Starić (jedna od boljih u Društvu zahvaljujući njenim članovima na čelu sa predsjednikom Harizom Salihovićem) koji su odstrijelili dva kapitalna vepra (preko 300 kg), među kojima su i vješti i spretni strijelci: Huso Jamaković zv. Hurma i Bego Begić zv. Bega.

Muhamed Husanović, lovočuvar



Lovačko društvo „Jelen“ Gradačac

Mala lekcija ljubavi prema lovstvu

Edisa Ibranović, poznatija kao Disa Lovac, najmlađi član LD „Jelen“ Gradačac, veoma je aktivna u pripremama pred sezonu lova na srndača: puni solila, iznosi hranu u lovište, pomaže u izgradnji čeka, naravno sve uz podršku iskusnog lovca, svog djeda Bajre Subašića, folk pjevača zvanog Baya Bosanac. Ova devetogodišnja djevojčica može da posluži kao primjer mnogim starijim lovcima kako se sa ljubavlju prilazi obavezama. S istom lovačkom straću voli svog njemačkog oštrod-lakog ptičara. Njen Brko (na fotografiji) položio je VJD ispit, a Disa ga priprema i za ispit krvnog traga. Disa Lovac je praksom upućena u lovstvo, a ne manjka joj ni teorijskog znanja jer voli da čita svu domaću i njemačku lovačku literaturu pa tako i Priručnik za polaganje lovačkog ispita.



Lovačko društvo „Jelen“ Gradačac

Na Međiđi nova lovačka kuća

U lovištu LD „Jelen“ Gradačac, na podrčju Međide, Senad Omerović, lovac LS „Međiđa Srednja-Gornja“, vlastitim sredstvima i trudom, izgradio je lijepu i nadasve funkcionalnu lovačku kuću, čije je potkrovlje opremljeno za konak, a ispred je velika pokrivena terasa. Svečanom otvaranju u maju su prisustvovali predstavnici Društva: v.d. predsjednika Predsjedništva Senad Mehulić, lovovođa Salih Lipovac, sekretar Enes Bećirbašić, članovi Nadzornog odbora Nurija Muratović, Ekrem Ibreljić, Fahrudin Gromić, kao i članovi susjednih sekcija. Prisutne je pozdravio Senad Omerović, naglasivši da kuću stavlja na raspolaganje svim lovcima, a posebnu pažnju je pobudilo obraćanje Huseina Imširovića (dao živote dva sina u odbrani BiH tokom posljednje agresije na BiH), doživotnog

predsjednika ove Sekcije i počasnog člana, koji je pozvao sve lovce da dođu u lov na područje kojim gazduje Sekcija, ali tražeći striktno poštivanje običaja i lovne etike. Inače, kako je istakao lovnik Sekcije Nazif Jahić, teren Međide je jedno od bogatijih brdskih lovišta, a marljivi i cijenjeni lovac Muhibija Bašić, koji u Predsjedništvu Društva zastupa Sekciju, dodaje da takvo lovište zaslužuje iskazanu brigu svih članova Sekcije na prehrani, prihrani i zaštiti brojne divljači. Sekcija ima i svoje muzikante, koji su sa sazovima i harmonikama pridonjeli veselijem druženju tokom svečanog otvaranja kuće na Međiđi.

Fahrudin Gromić





Lovačko društvo „Jelen“ Gradačac

Aljo i Aljina čeka

U Lovačkoj sekciji „Vučkovci“-LD „Jelen“ Gradačac, posebno je cijenjen prekaljeni lovac Aljo. Alija Bijelić je lovac od svoje rane mladosti, od 1966. godine, kada je uz oca Mehmeda upoznao sve tajne i draži lova. Za tih svojih 47 godina lovačkog staža zavolio je sve

što je sastavni dio lovstva, posebno lovačka druženja. Alju posebno poštuju mlađi lovci, ne samo zbog toga što od njega mogu puno toga naučiti, nego i radi njegove spremnosti da priušti ili prihvati šalu. Aljo ima i svoju lovačku čeku. Tu je odstrijelio sijaset lisica i zečeva, a vlasnik je i četiri trofeja divlje svinje. Aljina čeka je sinonim za druženje, okupljanje, doručak ili veselje. Kad se malo dokači rakije veselice tu Aljo zna zapijevati: „Ah moj Aljo, crne oči“.

Adil Turbić

Godišnja Skupština LD „Zelemboj“ Banovići

Ostvaren Plan gazdovanja

Lovačko društvo „Zelemboj“ Banovići je održalo redovnu godišnju Skupštinu kojoj su prisustvovali svi članovi, stručni saradnici i gosti. Među više tačaka dnevnog reda treba izdvojiti usvajanje Izvještaj o realizaciji Plana gazdovanja za prošlu lovnu godinu, kao i donošenje privremenog Plana

gazdovanja za lovnu 2013./14. godinu. Bez značajnih primjedbi su usvojeni i izvještaji organa i radnih tijela Društva (Izvještaj o finansijskom poslovanju, Nadzornog odbora, glavnog lovovođe, tužioca, Komisije za ocjenu trofeja ...).

Predsjedavajući Šerif Bečić, predsjednik Društva, istakao je da je uglavnom ostvaren Plana gazdovanja za lovnu 2012./13. godinu, da je bilo i dodatnih aktivnosti u lovištu na unapređenju lovno-privredne osnove (zasađivanje sadnica, prezentacija i učestvovanje u gastro ponudama i duge aktivnosti), a da Plana gazdovanja za lovnu 2013./14. godinu ima osnovni zadatak dalju implementaciju Zakona o lovstvu, poboljšanje lovnog fonda, izgradnju lovno-tehničkih objekata, pripremu za dodjelu koncesija gospodarenja lovištima, kao i druge aktivnosti na očuvanju i zaštiti lovišta, bioraznolikosti flore i faune, odnosno cjelokupnog prirodnog bogatstva u lovištu kojim gazduje LD „Zelemboj“ Banovići.

Mujo Mehikić



Lovačko društvo „Husić Mustafa Čektalo“ Sapna

Lovci za primjer



Lovačko društvo „Husić Mustafa Čektalo“ je relativno mlado lovačko društvo, ali svojim radom se može pohvaliti i biti za primjer mnogima. Društvo ima veliki broj lovno-tehničkih objekata, među kojima je lovački dom u Sapni, osam funkcionalnih lovačkih kuća koje su u upotrebi i dvije lovačke kuće u izgradnji. Unutar njega, lovačke grupe se natječu u izgradnji visokih čeka, koliba i hranilišta za crnu divljač. Može se reći da skoro nema grupe koja nema svog stalno aktivnog hranilišta za crnu divljač. Na površini od 1,5 hektara, ove godine Društvo je zasadilo kukuruz za ishranu divljači. Za narednu godinu je planirano i zasijavanje čičoke na pogodnim parcelama u samom lovištu. U Rožnju, djelu Majevice, izgrađeno je najviše hranilišta jer je tu teren pogodan za naseljavanje divljih svinja. Lovci Grupe „Nezuk“ (na fotografiji), na tom lokalitetu su sagradili još jedno novo hranilište koje je odmah postalo aktivno.

Said Smajlović

Lovačko društvo „Zelemboj“ Banovići

Hajka na vuka



Na osnovu dojava lovočuvara, planinara i šumara, LD „Zelemboj“ Banovići je saznalo da su u lovištu vukovi načinili više štete. Nađeni su i ostaci pojedena tri grla srneće divljači u dijelu lovišta Zelemboj-Velike Ribnice-Razvalski jelik. Predsjedništvo Društva je odlučilo da organizuje hajku na vukove u većem dijelu lovišta prema granici sa lovištem Zavidovići. U ovoj masovnoj hajci je učestvovalo 300 lovaca Društva (na fotografiji pored lovačkog doma

na Zelemboju), a bilo je i dosta lovaca iz ostalih lovačkih društava, kao i mještana iz okolnih sela. Nakon uputa predsjednika i glavnog lovovođe Društva, grupe i hajkači su započeli hajku. I pored opsežne pretrage lovišta ni jedan vuk nije odstrijeljen, mada su izvještaji govorili o brojnim većim tragovima. Nakon okončane akcije druženje je nastavljeno uz grah za sve učesnike hajke.

Mujo Mehikić

Lovačko društvo „Husić Mustafa Čektalo“ Sapna

Smajlovići dolijali liji

Na samom završetku lovne sezone 2012./13., u ranim jutarnjim satima, na lokalitetu Pečina iznad Sapne, „zapjevaše“ kerovi. Lovci po čekama čekali su lisicu. Hazim Smajlović, predsjednik LD HM Čektalo, izdvojio se na najdalju čeku i, prepoznavši štekanje svog baraka pušku je spremio i slušao pravac njegovog kretanja. Pošto se barak sve bliže štekanjem oglašavao, Hazim pomisli kako je ispred njega srneća divljač, ali je zastao da vidi šta je ispred psa i to se iplatilo jer ga lisica ovog puta nije nadmudrila. Bila je malo ispred baraka i kada je izašla na dio gdje je bilo bezbjedno za pucati, jednim hicem iz sačmarice 12mm, lisica je oborena. Na fotografiji su Hazim i Sulejman Smajlović.

Said Smajlović



Lovačko društvo „Zelemboj“ Banovići

Uspješno prebrojavanje divljači

Na osnovu odluke Predsjedništva LD „Zelemboj“ Banovići, Društvo je organizovalo i uspješno obavilo prebrojavanje sitne divljači na terenu Omazići-beširovići, na ranije obilježenim plohama u lovištu. U prebrojavanju

su učestvovala 124 lovca, pripravnici i pomagači. Rezultati su sumirani i predati glavnom lovovođi na dalju obradu podataka.

Mujo Mehikić

Neke aktivnosti LD „Spreča“ Kalesija

Održana redovna Skupština

Početkom aprila ove godine održana je redovna 8. izvještajna Skupština LD „Spreča“ Kalesija, kojom je predsjedavao gospodin Rasim Omerović, dipl. ing. šumarstva, kojoj je prisustvovalo 16 od 20 pozvanih delegata. Raspravljalo se o izvještajima o radu svih izvršnih organa Društva, Izvještaju o finansijskom poslovanju, Planu prihoda i rashoda za narednu godinu te Planu gazdovanja za lovnu 2013./14. godinu. Svi izvještaji su usvojeni bez primjedbi, kao Plan gazdovanja, što je pokazatelj ozbiljnosti dosadašnjeg rada Društva i domaćinskog gazdovanja.

Izgrađeno deset hranilišta za visoku divljač

Godišnjim Planom gazdovanja u lovištu, u tekućoj godini je planirana izgradnja lovno-tehničkih i lovno-uzgojnih objekata. Nakon što je glavni lovovođa Društva, u saradnji sa lovovođama i predsjednicima sekcija, odredio lokacije lovnih objekata, sve sekcije su uzele učešće u izgradnji tih objekata. Tako je na cijelom prostoru kojim gazduje LD „Spreča“ Kalesija izgrađeno 10 kombinovanih hranilišta za visoku divljač koja će u narednom periodu biti napunjena hranom i služiti prihrani visoke divljači. Hranilišta su izgrađena iz sredstava Društva za koje je utrošeno oko 2.500



KM., a radove su izvodili članovi svih sekcija na različitim lokacijama. Također, izgrađeno je i nekoliko visokih čeka u rejonu Sprečkog polja, te više solila za srneću divljač u cijelom lovištu. S izgradnjom hranilišta, čeka, solila i ostalih lovno-tehničkih i lovno-uzgojnih objekata, se neće stati. Na fotografiji je hranilište na lokalitetu Sekcije „Seljublje“.

Pokolj ovaca vuk platio glavom

Neobičan slijed događaja se skoro desio u lovištu LD „Spreča“ Kalesija. Neobičan je po tome što se desio u proljetnom vremenu kad hrane ima u izobilju i na teritoriji koja nije baš prikladno stanište vuka. Rijetkost je da ova zvijer zaluta u lovište ovog Društva, ali eto i to se dešava. Sredinom aprila vuk je upao u stado Radovana Draškića iz Zeline i za nekoliko



minuta je zaklao ovcu i jedno jagnje. Šteta bi bila veća da vlasnik nije primijetio i vikom otjerao zvijer. Ali očito da se jagnjetina svidjela vuku pa je sutradan, na očigled vlasnika, u večernjim satima ponovo upao u ovce i zaklao dva ovna i jednu ovcu. Nesretni vlasnik, vidjevši da se ne može nositi sa ovom zvijeri, zatražio je pomoć od LD „Spreča“. Već sutradan Društvo je krenulo u akciju. Organizovana je skupina lovaca sa zadatkom da se zvijer ili protjera ili odstrijeli. Prilikom ove akcije, u jutarnjim časovima, vuk je ponovno pokušao napasti ovce, ali je platio glavom. Mustafa Makalić, lovac Sekcije „Gornja Spreča“ (na fotografiji čuči prvi s desna), susreo se oči u oči sa zvijeri koju je uspio odstrijeliti prije nego je ova šmugnula u šikaru. Na sreću Draškića stado je danas bezbijedno, a vuk će prepariran krasiti prostorije lovačkog društva.

Abmet Beširović
sekretar LD „Spreča“ Kalesija


Lovačko društvo „Tuzla“ Tuzla

Lov kao porodična tradicija

Ne samo da se u Kišića lovačka puška predavala u naslijeđe s koljena na koljeno, nego je ova porodica najbrojnija u LD „Tuzla“-LS „Dobrnja“. Ova članska karta lovca Mehmeda Kišića pokazuje da ta lovačka tradicija datira od 1940. godine. O iznimno velikim zaslugama i priznanjima Kišića u razvoju i afirmiranju

lovstva ovdje neće biti riječi, ali treba barem pomenuti one koji su nakon Mehmeda nastavili, a i danas su uzorni i vrijedni lovci u porodici Kišić: Kasim, Mehmed, Hazim, Ibro, Alaga, Asim, Mirha, Mirzet, Husnija, Zijad, Muhamed, Edi ...

Husnija Kišić



ZANIMLJIVOSTI

Broj italijanskih lovaca brzo se smanjuje i dok ih je prije više od 30 godina bilo dva miliona danas ih je svega oko 700.000 i uglavnom imaju od 65 do 78 godina. Razlog tome je i u činjenici da su italijanski lovci prošle lovne sezone ubili 13 ljudi i ranili njih 33, što povećava pritisak u javnosti da se mijenjaju zakoni koji reguliraju lovstvo u Italiji. Da nesrećnih slučajeva u lovu ima i u našoj regiji pokazuje nedavni slučaj u Hrvatskoj kada je u lovu divlje svinje, na području Smokvice na Korčuli, Splančanin (34) hicem iz lovačke puške nehotice pogodio kolegu (45) te ga teško ozlijedio. Na mjestu događaja tridesetogodišnjak mu je odmah pružio prvu pomoć, nakon čega je teško ozlijeđeni četrdesetpetogodišnjak žurno prevezen u Dom zdravlja u Blatu gdje je ubrzo preminuo. Također u Hrvatskoj, javnost se sjeća slučaja kada je u lovu na divlje svinje, maloljetnik, koji je uskoro trebao napuniti 18 godina, ubijen je hicem u glavu; nedaleko od Velike Gorice otac je u lovu ubio sina: u Grubišnom Polju misleći da puca u vepra lovac je nastrijelio rođenoga brata; kod Zaprešića je lovac usmrtio kolegu iz lova. Na ovu temu je sprovedena zanimljiva kampanja u Istri pod nazivom „Siguran lov – četiri osnovna pravila sigurnog rukovanja vatrenim oružjem“, odnosno radi se o letku koji je štampan na hrvatskom i talijanskom jeziku, a u kojem su navedena ta četiri osnovna pravila: 1. Budite sigurni u svoju metu i njenu okolicu 2. Držite prst izvan otonca dok niste spremni za pucanje 3. Ophodite se prema svakom oružju kao da je napunjeno 4. Uvijek usmjerite usta cijevi u sigurnom smjeru. Ni nesreće u lovu u Srbiji nisu neuobičajena pojava, o čemu svjedoče brojna stradanja iskusnih lovaca. I kod nas u BiH novinske stranice crnih hronika su pune tragičnih događaja u kojima je lovac slučajno ubio ili ranio prijatelja lovca, što upućuje na potrebu striktno i pune primjene Zakona o lovstvu, pratećih pravilnika i internih akata lovačkih društava. Jedna takva opominjuća priča dolazi iz tesličkog kraja gdje je na očigled većeg broja lovaca, pucajući

iz lovačkog karabina na divlju svinju, lovac usmrtio kolegu i bratića Huskana Selimanovića.



U neizvjesnoj i nemilosrdnoj borbi „prsa u prsa“ četrdesetosmogodišnji Blažo Grković, iz sela Vrba kod Gacka, golim rukama je ubio medvjeda koji ga je napao dok je čuvao ovce. Medvjed je Grkovića napao na livadi ispod planine Volujak. U teškoj borbi hrabri Hercegovac je za-

dobio povrede po cijelom tijelu. Zubi medvjeda prošli su mu kroz kosti ruku i nogu. Medvjed je utrčao u stado i pošao prema Grkoviću, koji je u tom trenutku u džepu imao samo malu sjekiru. Uhvatio se u koštac sa medvjedom koji mu je izbio sjekiru iz ruku, ali ga je Blažo uspio savladati, odnosno udaviti. „U jednom trenutku, jedna ruka mi je bila u medvjedovim šapama, a drugom sam ga držao za grkljan dok nije pao“, kaže Blažo.

Lovci u Namibiji (Afrika) su ulovili čudovište, odnosno iznimno neobično biće kojemu se ne zna porijeklo. Sudeći po izgledu stvorenja, teško je povjerovati da je uopće ovozemaljsko. Lovci su vidjeli čudnovato biće u potrazi za hranom. Jedan od lovaca ga je pogodio, nakon čega je jezivo stvorenje pobjeglo u grmlje. Kada su pošli za njim, dočekao ih je šok. Još dva ista bića bila su bored onog kojeg su upucali. Jedno stvorenje ih je napalo, nakon čega su ga ubili. Ostala su pobjegla. Tijelo nesvakidašnjeg ulova odvedeno je u kamp, nakon čega je pozvana policija, a snimljeni prizori obiljeću svijet.



LOVAČKI VICEVI



Vođa lovačke sekcija se obrati lovcima:

– Ako sutra bude padala kiša prije podne, u lov idemo popodne,
a ako bude padala poslije podne, u lov idemo prije podne. Je l' jasno?!



Nedjelja ujutro, probudim se, tačno pet sati. Dignem se, obučem pantole, košulju, jaknu. Zavežem gojzerice, ruksak na leđa, pušku na rame i u lov. Otvorim ulazna vrata a vani snijeg pada k'o lud, vjetar ujeta. Prava mečava! Stojim,

razmišljam, krenut ili ne. Nakon dužeg kolebanja odlučim se, već polusmrznut, vratiti u krevet.

Raspremim stvari, ponovno se skinem i legnem do žene ne paleći svjetlo.

- Brrrr... Kakva je vani zima, sav sam se smrzo za par minuta.

- A ona moja budala je otišla u lov!



Pošto je lovac završio s ručkom, prilazi su konobar i ljubazno pita:

- I, kakav je bio srneći odrezak?

- Prvoklasan! To vam kažem kao stručnjak.

- Vi ste mesar?

- Ne, nego obućar!



Razgovaraju lovci u lovačkoj kući:

- Jel' neko lovio medvjeda?

Svi čute pa ovaj nastavi:

- Medvjed je veoma opasna zvijer. Ako potrčiš - potrči i on. Ako se popneš na drvo - popne se i on. Ako skočiš u vodu - skače i on za tobom.

- A šta ako se sakriješ?

- Pa sakrije se i on.

FOTOGRAFIJA IZ LOVA u skladu sa lovačkom etikom i kulturom



Moderno doba sa sobom je donijelo i fenomen brze razmijene informacija i dostupnost tih informacija velikom broju korisnika. U ovom tekstu, kao informaciju od značaja, posvetio bih pažnju lovačkoj fotografiji kao veoma vrijednoj uspomeni iz lova. U današnje vrijeme interneta i štampanih medija, fotografije koje nastaju u lovištima nakon odstrjela, dostupne su velikom broju korisnika informacija, a jedan dio tih korisnika će sve neprimjerene fotografije iskoristiti u borbi protiv lovstva i lova, a samim tim i nas - lovaca. Koristeći lovačke fotografije na kojima su prikazani neprimjereni sadržaji, protivnici lova stalno pokušavaju da ostatku građanstva lovstvo i lov prikažu kao okrutan sport koji se zasniva na ubijanju, a lovca prikažu kao krvoloka bez osjećaja. Ovi protivnici lova su najekstremniji kritičari lovačke fotografije. Osim njih, u zadnje vrijeme, sve je više lovaca koji zastupaju mišljenje da bi svaka fotografija koja nastane u lovištu, posebno sa odstrijeljenom divljači, trebala da prezentuje i promovise lovstvo, lovačku etiku i kulturu u pravom obliku i na svakom koraku. Naravno, osim navedenih kritičara svaki lovac bi trebao težiti ka tome da njegova lovačka uspomena u obliku fotografije uvijek bude osjećaj sreće i zadovoljstva koje je doživio taj dan u prirodi, a takvim gestom, ustvari, dokazuje da se radi o iskrenom lovcu odnosno pokazuje da je poštivanje etičkog kodeksa lovaca zaseban čin užitka u lovu i prirodi. Lovna etika i odnos lovca prema odstrijeljenoj divljači su elementi ponašanja na koje smo se obavezali istog trenutka kada smo postali članovi naših lovačkih udruženja. Lovna fotografija, koja je nastala uz poštivanje osnovnih elemenata lovačke etike i kulture, te poštivanja same prirode i divljači, lovac može bez ustručavanja i s ponosom da podijeli sa ostatkom društva.

Osnovni elementi koje treba uzeti u obzir prilikom fotografisanja sa odstrijeljenom divljači

Lovačka etika nam nalaže da prilikom lova maksimalnu pažnju posvetimo, prije svega, prirodi i divljači koja je predmet interesovanja lovca. Nakon odstrjela, lovačka etika nam nalaže da sa odstrijeljenom divljači postupamo s poštovanjem i zahvalnosti. Prilikom fotografisanja lovačkog trofeja veoma je bitno da nastala fotografija ne ostavi dojam nadmoći lovca nad divljači ili, još gore, nepoštivanja divljači.

IZUZETNO NEPRIMJERENO SE SMATRA:

- fotografisati se sa poluguljenom ili oguljenom divljači;
- prilikom fotografisanja naslanjati usta cijevi oružja na divljač,
- stajati nogom na divljač ili „jahati“ po divljači; divljač držati za uši... itd.



Fotografije: Izvor - Internet



Mala škola fotografisanja uz poštivanje lovačke etike i kulture

Da bi fotografija, koja je nastala tokom lova, bila kreativan čin i uspomena koju ponosno možemo podijeliti sa ostatkom društva, bitno je ispoštovati nekoliko osnovnih elemenata prije i tokom snimanja, odnosno fotografisanja. Prije svega, potrebno je ispoštovati navedena pravila koja se smatraju izuzetno neprimjerenim. Osim tih osnovnih pravila nabrojati ću nekoliko elemenata koje treba uzeti u obzir kako bi znatno povećali vrijednost fotografije u pogledu njene kvalitete i lovačke etike i kulture:

- Jedan od najbitnijih elemenata koje treba uzeti u obzir prije fotografisanja je **pozadina**. Potrebno je pripaziti da, ukoliko je moguće, pozadina bude neka lijepa panorama, odnosno pogled na prirodne ambijente, kao što su šumski kompleksi, livade, kanjoni i slično.
- Posebno je potrebno izbjegavati da se u kadru fotografije nađu elementi kojima nije mjesto na našoj uspomeni, kao npr. smeće, nepotrebna oprema, vozila, itd.
- * Prilikom planiranja i pripreme za fotografisanje veoma je bitno da je **divljač u prvom planu**, naravno položena tako da se jasno vidi i s isticanjem trofeja (rogovi, kljove i sl.).
- Posebno plemenito djeluje divljač položena na „prostirku“ napravljenu od grana četinara ili hrasta, ili nekog drugog listopadnog drveta (u zimsko doba se koriste grane na kojima nije opao list, prije svega hrast).
- Potrebno je pažnju posvetiti uklanjanju ili skrivanju krvi oko divljači i na divljači jer nikome nije cilj krvava fotografija.
- Ukoliko je na divljači vidljiva rana od pogotka, nju možemo jednostavno prekriti grančicom četinara ili listopadnog drveta na kojem ima list.
- Po lovačkoj etici, pojedinim vrstama, kao znak poštovanja, stavlja se grančica u usta, tzv. „posljednji zalogaj“. Bitno je napomenuti da „posljednji zalogaj“ pripada krupnim vrstama - preživarima oba spola i svih dobnih razreda (obični jelen, jelen lopatar, srna, muflon, divokoza) i pernatost divljači (tetrijeb gluhan, lještarka). Od krupnih vrsta „posljednji zalogaj“ ne pripada sljedećim vrstama divljači: divlja svinja, mrki medvjed, vuk, ris. Grančica „posljednji zalogaj“ ne pripada ni jednoj vrsti sitne divljači.
- * Lovci, kao i njihovi četveronožni pomagači, trebali bi da zauzmu mjesto iza divljači, poredani u vrstu ili više vrsta, u različitim položajima tijela.
- Jedan od bitnih elemenata kada je u pitanju lovac ili grupa lovaca, smatra se kodeks oblačenja, pa se tako smatra neprikladnim da lovac u lovu i na fotografiji nosi uniforme ili maskirna vojna odijela. (Kodeks oblačenja i označavanja lovaca su regulisani zakon-

skim propisima a pojedini časopisi čak njeguju pravilo da se fotografije ne objavljuju ukoliko su na njima lica neprikladno obučena).

- Još jedan bitan element kada su u pitanju lovci koji učestvuju u fotografisanju je izbjegavanje fotografisanja s nepotrebim predmetima, kao npr. flaše, limenke, cigarete, itd.
- Naročito lijepo izgledaju fotografije gdje lovci nose kompletnu opremu koja se koristi u lovu: oružje, dvogled, ruksak, itd.

Kao zaključak želim da kažem da ovaj tekst nije nastao s ciljem da se nekoga „uči pameti“ niti da se kritikuju oni koji misle i čine suprotno. Prvenstveni cilj ovog članka je da se onima koji bi željeli uložiti malo truda i vremena u lovačku fotografiju uz poštivanje lovačke etike i kulture, pokuša ukazati na najbitnije elemente kako bi što lakše došli do željenog rezultata. Takođe, bitno je naglasiti da su rijetke prilike da se ispoštuju svi elementi koji su nabrojani u tekstu, ali uvijek treba imati na umu da svaki primjenjeni savjet čini fotografiju i njenog autora korak dalje u pravcu kvalitetne fotografije, poštivanja lovačke etike i kulture.

Edin Herceg
LD „Majevica“ Srebrenik



Fotografije: Izvor - Edin Herceg



Selekcija srneće divljači u funkciji uzgoja

Selekcija, naročito kod krupne dlakave divljači, predstavlja veoma značajnu mjeru u gazdovanju lovištem, odnosno u sprovođenju mjera utvrđenih lovnom osnovom lovišta i godišnjim planom gazdovanja lovištem, a ima dva osnovna cilja: prvi, da se planirana gustina populacija u lovištu dostigne, što prije i drugi, da se stalno poboljšava kvalitet divljači i trofeja divljači. Osnovni ciljevi selekcije divljači postižu se:

- održavanjem normalne gustine populacija divljači u lovištu,
- blagovremenim odstranjivanjem (izdvajanjem, izlučivanjem) jedinki s nepoželjnim osobinama i
- dostizanjem i održavanjem željenog odnosa polova i starosne strukture populacije.

Navedeni ciljevi u osnovi se ostvaruju kroz selektivni, a izuzetno i kroz redukcionu odstrjel divljači.

Selektivnim odstrjelom se odstranjuju iz populacije sve nerazvijene i za razmnožavanje neprikladne jedinke, zatim bolesne, ranjene ili na drugi način povrijeđene, iscrpljene i stare jedinke. I sanitarni odstrjel divljači u određenim slučajevima predstavlja u suštini vid selektivnog odstrjela. Se-



lektivnim odstrjelom se reguliše polna struktura (odnos polova), starosna struktura, kvalitet divljači, kvalitet trofeja divljači, održava se optimalni broj divljači i ekonomski kapacitet lovišta. Selektivni odstrjel divljači vrše radnici stručne službe korisnika lovišta vodeći pri tome računa o svim elementima bitnim za razvoj i opstanak populacija divljači u lovištu.

SRNA

Srna (*Capreolus capreolus*) je najbrojniji i najrepresntativniji predstavnik porodice jelena na prostoru BiH pa tako i TK. Srna je atraktivna divljač gotovo svih staništa sa posebnostima koje zaslužuju mjere intenzivnog uzgoja i zaštite, a

ipak je ugrožena. Ugrožavaju je predatori, nedovoljne mjere uzgoja i prihrane, krivolov svih vrsta, zimski uslovi u staništu. Srna je papkar i preživar iz porodice jelena sa završenim morfološkim razvojem. Ipak, ako je jelen najveličanstvenija životinja u šumama i lovištima, srna je, zasigurno, najljepša. Istovremeno, to je najbrojnija i najrasprostranjenija krupna divljač u Evropi. Živi u različitim staništima od Grčke do Skandinavije i od Španije do Urala. Nema je jedino na mediteranskim ostrvima i u Irskoj. Srna je divljač izrazitog polnog dimorfizma - mužjaci se lako razlikuju od ženki. Srnać ima rogove, srna je bez rogova, izizetno starijoj srni izrastu kratke rožnice. Srna (mužjak: srnać, mladunče: lane) je životinja izrazito vitkih i skladnih linija sa krupnim očima i karakteristično lijepom gubicom. Odrasla je visoka od 0,75 do 0,80 cm, teška do 35 kg - srnać i do 30 kg - srna. Prosječna težina je oko 21 kg. Na zadnjem dijelu tijela, ispod zakrčljalog repa, karakteristična je bijela dlaka - kod mužjaka ovalnog, elipsastog oblika, a kod ženke u obliku obrnutog srca. Dlaka srne ljeti je plameno crvenkasta, a zimi mrkosiva duža i gušća. Dlaku srna mijenja dva puta godišnje. Proljećna promjena dlake je od kraja marta do maja, a jesenja krajem septembra i početkom oktobra. Vrhunac tjelesnog razvoja srna dostiže u sedmoj godini, bez obzira što skeletni rast završava već u petoj. Srna živi do 15 godina. I srnać i srna se oglašavaju dosta slično s tim da srnać bauče kratko, odsječno i duboko, a srna nešto višim i dužim glasom, piskavije. U vrijeme parenja srna piskavim glasom zove mužjaka. Interpretacija njegovog glasa došla je glave mnogim trofejnim srnaćima. Srna ima jako razvijeno čulo njuha i sluha, dok je čulo vida znatno slabije. Parogovi kod srnaća rastu na parožištima. Mladim mužjacima već poslije četiri mjeseca izrastu mali šiljčići koji u martu otpadnu. Odmah poslije toga izrastaju novi parogovi. Godišnjaci su obično **šilar**, rijetko kad se u prvoj godini rogovi počnu računati. Dvogodišnji srnać je već šesterak, rijetko vilar (s jednom rašljom, odnosno dva paroška). Srnać je do kraja života **šilar** (nerazvijen), **vilar** (veoma rijetko) ili najčešće **šesterak**. Osmerak, deseterak i dvanaesterak su velika rijetkost kod srnaća. Interesantno, da starost srnaća poslije dvije godine (kada je već vilar ili šesterak) određujemo po stanju karakterističnog zubala. Parogove srnać odbacuje krajem oktobra i u novembru, snažniji srnaći već krajem septembra i početkom oktobra. Tokom zime parogovi rastu u bastu (lika, vlasulja ili runja), a čiste se u aprilu i maju. Tokom zime kod srnaća parogovi rastu pod posebnim zaštitnim omotačem - kožom obraslom dlakom bogatom krvnim sudovima i živčanim spletovimima i to je basta, vlasulje ili runja. Poslije okoštavanja paroga prekida se veza sa krvnim sudovima i basta odumire, a srnać počinje da čisti parogove. Očišćeni parogovi su u početku bijeli, a zatim dobijaju određenu boju, zavisno od oksidacionih procesa u kojima učestvuje zgrušana krv i sokovi drveća o koje srnać češe parogove. Srna je divljač mješovitih lišća-

ra i lišćara i četinaru s prosjecima i proplancima. Najviše joj odgovaraju valovita brdska područja sa naizmjeničnim parcelama šuma, livada i obradivog zemljišta. Inače, nije vezana za stalna izvorišta vode. Srna je biljojed i preživar. Hrani se travom i zeljastim biljkama (75-80%), rjeđe brsti i to u periodu kada je trava pokrivena snijegom ili u šumskim staništima gdje je prizemna vegetacija siromašna. U šumi jede mlade četinare, žir, divlje kruške, divlje jabuke, imele, plodove smreke. Na pašu izlazi po mraku i pase do kasno u noć. Ostatak noću miruje i preživara, a prije svitanja opet izlazi na pašu. Srna je izrazito teritorijalna vrsta, naročito s tipičnim staništima. Mužjak obilježava teritoriju mirisnim žlijezdama koje se nalaze na čeonj kosti (između grana parogova) i na skočnom zglobu zadnjih nogu. Srna ima tri karakteristične žlijezde. Jedna je između prstiju zadnjih nogu - ona ostavlja mirisnu oznaku po kojoj se jedinke traže. Druga žlijezda je, takođe, na zadnjoj nozi sa spoljne strane, neposredno ispod članka. I ova žlijezda ostavlja mirisni trag. Treća je između parožišta samo kod srnaća. Srna živi uglavnom u matrijhalnim familijama (ženka, ovogodišnja i prošlogodišnja lanad). Mužjaci žive sami. Ipak, zimi se grupišu u veće skupine oba pola, a predvodnik takvog krda redovno je najjača srna. Interesantno, ako srnać koji je obilježio svoju teritoriju iz bilo kojih razloga uginu na njegovo mjesto odmah dolazi mlađi srnać koji se takođe bori za tu teritoriju. Mladi srnaći su često proganjani i moarju se boriti za svoju teritoriju. Razmnožavanje srna počinje parenjem u julu i avgustu i traje, uglavnom, mjesec dana. Neke neoparene srne pare se i u novembru. Polnu zrelost srna dostiže u drugoj, a srnać u trećoj godini. Srna je poligamna vrsta. Srnać se pari sa više srna, ali ne formira »harem« (kao jelen), već pari jednu po jednu srnu kada na svojoj teritoriji traži drugu. Otuda pogrešno mišljenje da je srnać monogamna vrsta, pošto se u vrijeme parenja viđa samo sa jednom srnom. Interesantno, da se zametak u srni ne razvija odmah, već ostaje u pritajenom stanju sve do decembra. Ova pojava se naziva embriotenija i zato se jednovremeno lane srne koje su oparene u julu i novembru. Inače, bremenitost srne traje devet mjeseci, a pomenuto mirovanje zametka oko dvanaest nedelja. Srna se lani obično u maju i olani 1-4 laneta, najčešće 1-2. Globalnom promjenom klimatskih uslova, vrijeme lanjenja srne je znatno ranije, neki smatraju čak krajem marta i početkom aprila. Prisustvo srne na određenom prostoru otkrivamo po tragovima koje ostavlja u mekoj podlozi, po prisustvu izmeta (moguće je čak razlikovati srnaća i srnu), po uređenim ložnicima koje srna brižljivo priprema prije odmaranja, po tragovima kopanja gomolja. U šumi, po tragovima češanja rogovima srnaća kao i zakinutom travom i niskim rastinjem. Proganjana brojnim neprijateljima, srna je izgradila i instinkt za samoodržanjem koje neki pored morfoloških osobina pripisuju i lukavstvu, naročito kod starijih srnaća. Među brojne prirodne neprijatelje srne spadaju vuk, ris, mačka, lisica, kuna, medvjed, orao. Prema Pravilniku o načinu upotrebe lovačkog oružja i naboja najmanji dopušteni kalibar za lov na srneću divljač je 5,56, najmanja dopuštena

kinetička energija zrna na 100 m je 1000 džula, najmanja dopuštena težina zrna je 3,24 grama i najveća dopuštena daljina gađanja je 150 metara.

Selektivni odstrjel srna se vrši se u toku sezone lova na osnovu Zakona o lovstvu FBiH, naredbi o lovostaju i operativnim kalendarima o aktivnostima u lovištima. Selektivnim odstrjelom srna u suštini iz populacije se odstranjuju određena grla unutar starosnih klasa. Starosne klase predstavljaju grla oba pola koja su razvrstana u klase: LANAD, PODMLADAK (I klasa), SREDNJEDOBNA (II klasa) i ZRELA GRILA (III klasa). Podjela na starosne klase srna zasnovana je na biološkim i socijalnim karakteristikama ove vrste i ona je dovoljna za ocjenu strukture jedne populacije srna i za sprovođenje praktičnih mjera gajenja i korišćenja ove vrste divljači u lovištu.

LANAD: Odstrjeljuju se grla oba pola, kada su krčljava, slabo razvijena, mršava, jako rano ili jako kasno olanjena, zatim kod blizanaca ili kod trojaka uvijek slabija, pa ranjena, povrijeđena, s jakim napadom parazita, iscrpljena bolešću ili vremenskim nepogodama. Težište selektivnog odstrjela treba usmjeriti na lanad ženskog pola.

PODMLADAK: Grla oba pola do navršene druge godine života, koja su slaba, zaostala u porastu i razvoju, albino grla, zatim ranjena, povrijeđena na razne načine, iscrpljena bolešću ili vremenskim nepogodama. Odstrjeljuju se muška grla sa slabo razvijenim rogovljem, s uskim ili jako širokim rasponom rogovlja, s deformisanim rožištem, s rogovljem u vidu perike ili kvrga, s jako šiljatim rogovljem, s jako kratkim ili jako tankim rogovljem i s rogovljem koje se jako dugo zadržalo u bastu ili liki. Kvalitetna muška grla - srnaći u ovoj klasi treba da su jaki »rašljani« ili slabi »šesterci« pravilno razvijeni s dobrim rasponom rogovlja, s tupim vrhovima parožaka i s paroščima dužine 10-15 cm. Ženska grla - srne »dvizice« u ovoj klasi treba maksimalno štedjeti.

SREDNJEDOBNA GRILA: Grla oba pola od navršene druge do navršene pete godine života, koja su propuštena iz prethodne dvije klase starosti i dospjela u ovu. Odstrjeljuju se muška grla u ovoj klasi starosti, koja imaju rogovlje u klasi »šesterca«, zatim ona grla čije je rogovlje slabo razvijeno i ima nepravilan oblik ili deformitet na jednoj ili na obje »grane« s padom mase prema vrhu, pa grla sa jako ostrim - šiljatim vrhovima parožaka i ona grla koja su povrijeđena ili iscrpljena elementarnim nepogodama ili na drugi način bez obzira na kvalitet trofeja. Selektivnim odstrjelom muških grla u ovoj klasi starosti najveći zahvat se vrši u trećoj godini života, a kasniji ukoliko brojnost muških grla u populaciji zadovoljava odstrjel se vrši po kapitalnosti trofeja (rogovlja). Odstrjeljuju se ženska grla, koja se pare jako rano ili jako kasno i na taj način produžavaju period reprodukcije, pa ženska grla koja ne vode lanad ili su »jalova« dvije ili više godina uzastopno, zatim ženska grla koja se više puta troje ili vode slabu lanad i ona grla koja su povrijeđena ili iscrpljena elementarnim nepogodama ili na drugi način. Kada se odstrjeljuje srna koja vodi lane najprije se odstrijeli lane, pa onda srna!

Sanitarni odstrjelom srna iz populacije se odvajaju sva grla koja su ranjena, povrijeđena, bolesna, jako napadnuta parazitima, zatim grla koja su iscrpljena bolešću, napadom parazita ili vremenskim nepogodama bez obzira na pol, starost, kvalitet trofeja i doba godine, vodeći računa o poštovanju odredbi Zakona o lovstvu FBiH. Sanitarni odstrjel po pravilu vrše radnici stručne službe korisnika lovišta, a mogu ga vršiti i lovci, kada u redovnom lovu naiđu na divljač, koja se po principima sanitarnog odstrjela treba odstraniti iz populacije.

Redukcioni odstrjel srna je mjera gajenja divljači koja se primjenjuje vrlo rijetko i to onda kada broj srna u lovištu ili dijelu lovišta pređe granicu optimalnog (normalnog) broja, odnosno utvrđeni ekonomski kapacitet lovišta za ovu vrstu divljači. Redukcionim odstrjelom iz populacije se odstranjuju sva prekobrojna grla, jer to zahtijevaju interesi šumarske, poljoprivredne ili druge proizvodnje organizovane u lovištu ili u neposrednoj okolini lovišta. Redukcioni odstrjel srna se vrši uz prethodno usaglašavanje sa korisnicima susjednih lovišta!

Trofejni odstrjel srndaća predstavlja dobru žetvu korisnika lovišta, a s tim odstrjelom iz populacije se izdvajaju zrela grla, koja po pravilu nose kvalitetan trofej, daju kvalitetnu kožu i meso, a samim tim i najbolje ekonomske efekte gazdovanja lovištem. Najjača muška grla visoke trofejne vrijednosti treba odstrjeliti po završetku sezone prvog ciklusa parenja, kako bi ostavila još jednu generaciju svog potomstva.

OCJENA STAROSTI ŽIVIH SRNA

Polazeći od načela da je prilikom selekcije srna osnovno opredjeljenje: ukloniti sva grla koja zbog osobina i stanja u kojem se nalaze nisu poželjna da učestvuju u razmnožavanju i da ostavljaju potomstvo loših osobina u lovištu, između ostalog zahtjeva i što tačniju ocjenu starosti živih grla u populaciji srna. Da bi radnici stručne službe korisnika lovišta što uspješnije u lovištu ocijenili starost pojedinih grla srna, neophodno je da poznaju osnovne pokazatelje na osnovu kojih će dati tu ocjenu. Ti pokazatelji se prikazuju priručnicima namjenjenih radnicima stručne službe prilikom redovnih osmatranja srna u lovištu i ocjene njihove starosti. Upoređivanjem kvaliteta tijela i kvaliteta trofeja posmatranog muškog grla sa starošću grla može se pravilno ocijeniti da li to grlo treba ostati u lovištu (kao perspektivno) ili ga treba odstrjelom eliminisati iz lovišta. Isto tako, upoređivanjem kvaliteta tijela i starosti posmatranog ženskog grla, može se pravilno ocijeniti da li to grlo treba ostati u lovištu (kao perspektivno) ili ga treba odstrjelom eliminisati iz lovišta. Pokazatelja po kojima se ocjenjuje starost živih srna ima više. Neki od tih pokazatelja su pouzdani, dok su neki manje sigurni. Priručnicima se želi ukazati upravo na one pokazatelje za koje se smatra da su više sigurni, odnosno najsigurniji, ali to ne isključuje korišćenje i onih manje sigurnih pokazatelja prilikom ocjene starosti živih srna. Uočavanjem i tih pokazatelja sigurno će ocjena starosti biti sigurnija, naročito u vrijeme, kada oni pouzdaniji pokazatelji nisu uočljivi.

Ocjena starosti srna se vrši po:

- vremenu kada se na srnama vrši izmjena ljetnje i zimske i proljetnje dlake, odnosno po vremenu linjanja,
- obliku tijela i pojedinih djelova i organa na tijelu (glava, čelo, oči, vrat, nozdrve, trup),
- boji ljetnje dlake na tijelu i zimske dlake na vratu - podgrlcu,
- ponašanju u normalnom stanju za vrijeme mirnog hoda ili za vrijeme paše,
- vremenu početka i završetka čišćenja rogovlja od basta (like) i
- obliku rogovlja i djelova rogovlja (ruža - vijenac, parošci).

Najpouzdanijim pokazateljima za ocjenu starosti srna smatraju se: oblik tijela i dijelova tijela, kao i organi; zatim ponašanje i pokreti srna u mirnom hodu ili paši; izmjena zimske u proljetnju dlaku (linjanje) i skidanje basta s rogovlja u određenom periodu godine.



OCJENA POJEDINIH GRILA U RAZLIČITIM KLASAMA STAROSTI

Lanad muška i ženska od 6 do 12 mjeseci starosti

Kod muškog laneta po završetku izmjene ljetnje u zimsku dlaku (linjanja) formira se čuperak - kućuca od dužih dlaka na donjem dijelu stomaka oko polnog organa. Kod ženskog laneta čuperak - kičica dužih dlaka nalazi se na zadnjici oko polnog otvora i on je svjetložute do svjetlosmeđe boje. Kod muškog laneta već u septembru, a najčešće u oktobru, jasno su vidljiva rožišta. Kod izuzetno naprednog laneta izraste i mladalačko rogovlje.

I klasa starosti 1 i 2 godine (jednogodišnja srna – »dvizica«)

Tijelo je u cjelini izduženo, vitko, a trup uzak, gotovo s paralelnim linijama kičme i stomaka. Glava je duga i uska, a vrat tanak i izdužen. Boja ljetnje dlake ima nijansu svijetlo sivo-žučkaste boje.

I klasa starosti 1 i 2 godine (jednogodišnji srndać)

Tijelo u cjelini nema izgled potpune razvijenosti. Zimsku dlaku mijenja u ljetnju u maju i početkom juna, a to je nešto kasnije od dvo i trogodišnjeg srndaća. Vrat je tanak i na izgled dug, glava je uska sa ulegnućem na sastavu čeone i



nosne kosti, oči su male, a nos sitan, što sve skupa glavi daje mladolik izgled. Vrat pri mirnom kretanju drži u odnosu na liniju kičme (leđa) podignut naviše.

II klasa starosti 3, 4 i 5 godina (srednjedobna srna)

Tijelo je šire i zaobljeno, stomak malo istaknut, dublji i raširen. Vrat u odnosu na puniji trup izgleda tanji. Zimska dlaka se mijenja u ljetnju prije nego kod starih srna, ali samo kada su srednjedobne i stare srne bremenite.

II klasa starosti 3, 4 i 5 godina (srednjedobni srndać)

Tijelo je potpuno izraslo i formirano s karakteristikama zrelosti: deblji i »kraći« vrat, nešto veća glava sa širokim čelom i krupnim očima. Vrat prilikom mirnog kretanja je vodoravan i djeluje snažno. Zimska dlaka počinje i završava da se mijenja u ljetnju, prije kod mlađih nego kod starijih srndaća.

III klasa starosti 6, 7 i više godina (stara srna)

Trup je veliki zbog razvijenog, dubokog i opuštenog stomaka. Glava je izrazito koščata i velika, a oči velike. Vrat u odnosu na veliki trup i glavu izgleda tanak, mršav i izdužen.

Jako stara srna pored velikog stomaka ima upale slabine, pa se čini da ima prazninu ispod zadnjeg dijela kičme.

III klasa starosti 6, 7 i više godina (stari srndać)

Tijelo je snažno s kratkim i debelim vratom, koji je u mirnom kretanju vodoravan u istoj liniji s kičmom. Prilikom mirnog kretanja klima glavom gore dolje u određenom ritmu. Glava je velika sa širokim čelom i nozdrvama. Oči su krupne kao »ruža«. Jako stari srndać (»prestarjelo grlo«)

zbog općeg slabljenja tijela i životnih funkcija ima nešto tanji vrat, donekle smanjeno tijelo, pa djeluje »usukano«.

OCJENA STAROSTI PO BOJI LJETNJE DLAKE

Lanad

Do starosti jedan mjesec po rebrima i po leđima uočljive su bijele pjegice (peče), koje se postepeno s povećanjem starosti sve manje uočavaju, jer ih prekriva duža crvena ljetnja dlaka. Ove pjegice se potpuno gube sa prvim jesenjim linjanjem poslije kojeg kod lanadi boja dlake postaje ista kao i kod odrasle divljači.

Odrasla grla

Odrasle srne se linjaju dva puta godišnje. Ljetnja dlaka je crvena, a zimska žuto-smeđa. Ljetnja dlaka je najintenzivnije obojena kod mlađih zdravih dobro razvijenih grla, dok je kod starijih, naročito srndaća nešto svjetlija (bljeđa).

OCJENA STAROSTI PO BOJI DLAKE NA GLAVI

Lanad

Dlaka glave je tamne boje, a sivo-bijela mrlja iznad nosa dobro je uočljiva.

Srna

Srne dvizice i srednjedobna grla imaju istu boju kao lanad. Stare srne povećanjem starosti gube sivo-bijelu mrlju iznad nosa, tako da cijela glava postaje jednobojna - siva.

Srndać

Kod srndaća godišnjaka cijelo »lice« ima tamno sivo-smeđu dlaku, a na sred čela se nalazi tamna kovrdžava »čeona mrlja«. Oko očiju se nalazi smeđe-žuti vijenac. Veoma važna činjenica je da, skoro nikada, srndać godišnjak nema bijelu mrlju (»brnju«) iznad nosa. Kod srndaća dvogodišnjaka iznad nosa, na nosnom hrptu prema čelu, uvijek se uočava oštro obrubljena bijela mrlja, koja je jasno odvojena od tamne »čeone mrlje«. Oko očiju je vijenac svjetlijih dlaka. Kod trogodišnjih i četverogodišnjih srndaća »brnja« vrlo često izostaje, a kada postoji nije oštro izražena, kao kod dvogodišnjih srndaća. »Čeona mrlja« je još tamna. Vijenac oko očiju je nešto svjetliji, a »brnja« nije više izrazito bijela, već je prošarana sivim dlakama. Kod petogodišnjih do osmogodišnjih srndaća čeoni hrbat je u potpunosti svjetlosiv, a »čeona mrlja« je tamna i protkana sa sijedim dlakama i manja je nego kod mlađih srndaća. Svjetli vijenac oko očiju potpuno okružuje oči. Po cijeloj glavi preovladava svijetla dlaka. Kod srndaća starijih od osam godina nosni hrbat je potpuno svjetlosive boje. »Čeona mrlja« je svijetla kod većine srndaća samo naznačena. Vijenac oko očiju je širok, jasnije uočljiv i izrazito svijeto. Svijetla, naročito bijelo-siva dlaka preovladava po cijeloj glavi. Kod veoma starih srndaća nema »čeone mrlje«, a bijelo-sive dlake su po cijeloj glavi.

OCJENA STAROSTI PO IZGLEDU DLAKE

Mlada zdrava grla imaju sjajnu dlaku prileglu uz tijelo, kao počesljanu. Stara grla imaju dlaku bez sjaja, koja je blago nakostrešena.



IWA 2013 & Outdoor Classics

Ovogodišnji sajam lovačkog i sportskog oružja i opreme IWA 2013. održan je ove godine po jubilarni 40. put u njemačkom gradu Nirnbergu od 8. do 13. marta 2013. godine. Ova najkvalitetnija svjetska izložba lovačkog i sportskog oružja, opreme za život u prirodi, streličarstva, optičkih sredstava, noževa, pribora za službe obezbjeđenja i specijalne snage, okupila je ove godine 1.207 izlagača iz više od pedeset zemalja. Najviše izlagača (287) imala je zemlja domaćina, Njemačka, na drugom mjestu po broju izlagača imale su SAD (188), a slijede Italija (124), Velika Britanija (60), Turska i Francuska (54), Austrija (39), Kina (36), Češka (33) i Rusija (29). Štandove raspoređene u osam izložbenih hala, na 74.000 km², posjetilo je više od 38.000 ljudi. Ovo je velika brojka s obzirom da je IWA sajam zatvorenog tipa i da za ulazak na njega svako mora da ima validnu garanciju firme ili ustanove, od koje je poslat. Taj strogi uslov ispunilo je 38.000 posjetilaca iz 109 različitih zemalja sa svih kontinenata. Pored izlagača i posjetilaca IWA je centralno svjetsko mjesto okupljanja predstavnika oružarskih organizacija, streljačkih asocijacija, udruženja puškara, zavoda za ispitivanje i žigosanje oružja i municije, udruženja proizvođača noževa, izdavača oružarske, lovačke i streljačke literature, udruženja firmi za obezbjeđenje.

Prvi dojam je da proizvodnja sačmarica svih vrsta i kalibara nije u krizi, već se intenzivno razvija. Ogroman broj turskih firmi tome daje pečat. Turske sačmarice su sve kvalitetnije. Comando Arms turske položare sa H&H vatrama, koje su izuzetne i koštaju više od 3.000 eura. Lovачki karabini idu smjerom ručnog, kratkog i brzog repetiranja, uz sve više karabina direktne akcije i pamp-kliznog segmenta na podkundaku. Novih poluautomatskih karabina je sve manje. Teške long-range dalekometne puške su u velikoj ekspanziji. Sportsko vrhunsko vazdušno i malokalibarsko oružje se zadržava na ustaljenom obimu. Firme koje rade municiju su stabilne i imaju mnoštvo novih zrna i kalibara. Zanimljivo je da je svjetska ekonomska kriza prilično pošteđela municijaše.

Streličarstvo u izradi noževa su u blagoj ekspanziji. Proizvodnja optičkih nišana, dvogleda, laserskih merača daljine, noćnih vizira, teleskopa i uopće opto-elektronskih sredstava, oblast je gdje se naj-



više radi. Svi imaju nove proizvode i tu vlada velika konkurencija.

Najveći novitet 40. Sajma je Brauningov novi lovački karabin po imenu Maral. U pitanju je repetirajući lovački karabin kod koga se ručica zatvarača sama vraća naprijed, uvodi novi metak u ležište i zavravljuje cijev. Blazeri R93, R8, Štraser, Merkel Heliks, Hajm SR30, kao i drugi karabini direktne akcije (pravokretno kretanje, zatvarača nazad-naprijed, bez povlačenja ručice na gore) su u Brauningovom modelu Maral dobili jakog konkurenta. Pokriva sve popularne kalibre, a cijena mu je ispod 2.400 eura.

U istoj familiji direktne akcije novitet su imali i Austrijanci sa svojom puškom Titan Resler 16. Ime novog karabina Titan govori da zatvarač sigurno zavravljuje cijev preko 16 zavravljujućih površina. To će po tradiciji modela Titan 6, koji je bio najjeftiniji karabin na tržištu s mogućnošću lake i brze zamijene cijevi i kalibara, svakako biti cijenom najprihvatljiviji karabin direktne akcije. Austrijski Rossler nije velika fabrika, ali može da preuzme veliki dio kupaca koji žele solidnu i ne preskupu pušku.

Novitet na Sajmu je prikazao i prestižni njemački Sauer. U vidu lovačkog karabina Sauer 101 i pod sloganom Old school - new rules (stara škola - nova pravila). Ova lagana puška savremenih rješenja, omogućuje lovcima da love puškom slavnog Sauer imena, ali po znatno nižoj cijeni od dosadašnjih modela. Nova klasična obrtno-čepna repetirka je predviđena za devet standardnih i tri magnum kalibra, uz veoma malu masu od 3,05 do 3,15 kg. Cijena joj je nešto ispod 1.500 eura, što je dosta manje od dosadašnjih cijena za puške Sauer. Sličan ovom novom Saueru 101 je i karabin Mauser M12. Očigledna je vlasnička veza Sauera u Mauzera pa ne čudi sličnost konstrukcije njihovih najnovijih pušaka. Za razliku do Sauera 101, Mauser M12 ima fine mehaničke nišane. Ista vlasnička grupa pokriva i slavno ime Blaser, gdje se akcent uveliko stavlja na mnoštvo verzija Blazera R8. Lijepa, precizna i skupa puška.

Baš kao i Blazer R8, tako i firma Merkel, koja sada pripada firmi Karakal iz Arapaskih Emirata, svoj akcent na IWA stavlja na odlični karabin direktne akcije RX. Helix. On se sada radi u mnogo nivoa luksuzne gravure i orahovine, ali i u ekonomičnim polimer verzijama. Svaki kupac je u ovim vremenima dobrodošao i svaka skupa puška može da ima i jeftinu verziju.

Masa klasičnih sačmarica položenih i bok cijevi je prikazana na sajmu IWA. Od dobro poznatih Sabatija, preko Ricinija, Zolija, Aye, Garbija, Pedra Arizabalage, Johana Fanzoja... U poplavi novih poluautomatskih sačmarica turskih, italijanskih, na Sajmu mnogo hvaljenih ruskih IŽ MP155 Baikal, ipak treba izdvojiti pravi novitet: FN Brauningov poluatomat A5. To nije onaj stari Browning Auto5, kod koga se cijev kretala unazad, već nova puška bazirana na inercionom radu zatvarača. Biće u kalibrima 12/76 i 12/89. Radi pouzdano sa svom municijom težine 28 do 66 g sačme. A5 ima sve Brauningove novitete integrisane u sebi: šire bušenje cijevi, produženi prelazni konus, 80 mm duge izmjenjive čokove i vrlo fini rad. Na istom principu inercije radi i osvježeni redizajnirani Benelijeve poluatomat Rafaelo, koji je odavno poznat i veoma cijenjen na tržištu.



CZ 557 LUX

Ruski Baikal nudi viku dvadeseticu IŽ-27 s ovalnim lankaster unutrašnjim blagim ožljebljenjem cijevi. Tvrdi da jedinačni projektil ispaljen iz ovih cijevi ima dobru putanju, znatno iznad puška klasično glatkih cijevi. Italijanski proizvođač Chiappa je prikazao zanimljivu

sačmaricu kalibra 12/76, koja ima tri cijevi. Umjerene je težine i veoma upotrebljiva. Prestižni Beretta i Perazzi iz Italije imaju lijepe i kvalitetne nove sačmarice položenih cijevi. Beretta nosi naziv 486 Parallelo, a Perazzi DC 20. Peraci je dvadesetice, a Bereta dvanaestica magnum. Divne puške.

Njemački štand Kurt Katzenmeier nudi divne odreske kavkaske, turskog i francuskog oraha, čija su stabla stara i više od 300 godina, sa sirovim kundacima sačmarica i karabina s neopisivim vrtložnim šarama orahovine. Ova firma se od 1880. bavi orahovim kundacima i već četiri generacije Kacemajera važe za eksperte u ovoj oblasti. IWA 2013. ponudila je mnoštvo opreme za lov. Sve što se može naći u lovištu ili lovačkoj sobi, nuđeno je u Nirnbergu. Sve se to moglo razgledati i naručiti, ali ne i kupiti, jer IWA nije prodajni sajam.

IN MEMORIAM



**Turbić Džafer
zv. Džoni
(1930. - 1992.)**

Navršilo se je 20 godina od prerane smrti našeg voljenog druga Džafera, cijenjenog člana LS „Vučkovci“-LD „Jelen“ Gradačac. Još uvijek se rado sjećamo našeg Džonija, njegovih šala i doskočica. Njegova drugarska pažnja nikad neće biti zaboravljena.

LD „Jelen“ Gradačac



**Vareškić Marko
(1936. - 2013.)**

Početak marta, tačno na 24-godišnjicu svog lovačkog staža, prestalo je da kuca plemenito srce našeg Marka, uzornog člana LS „Šiški Brod“-LD „Tuzla“. Volio je sve ljude, a kao strastven zaljubljenik prirode i lovačkog druženja, posebno je volio kolege lovce. Kao zaštitnik divljači nije nosio oružje, ali zato jeste pun ranac. Za 90-godišnjicu postojanja LD „Tuzla“, naš pokojni i nezaboravni Marko je predložen za diplomu, a to priznanje će biti uručeno njegovoj porodici.

LD „Tuzla“



**Hrnjić
(Muharem) Mujo
(1943. - 2013.)**

U sedamdesetoj godini života redove LD „Srndač“ Gračanica je zauvijek napustio naš Mujo, čiji je član bio još od 1968. godine. Za cijeli taj dugi lovački vijek je bio cijenjen među kolegama, ističući se u uzgoju, zaštiti divljači i izgradnji lovno-uzgojnih objekata. Zbog svojih zasluga za unapređivanje lovstva dobio je više lovačkih priznanja i odlikovanja. Zaviček će nam nedostajati njegovo prijateljstvo, a posebno lovcima njegove LS „Miričina“. Neka mu je vječni rahmet.

LD „Srndač“ Gračanica



**Džananović (Salko) Salkan
(1942. - 2013.)**

Dvdesetog maja, redove LD „Spreča“ Kalesija je zauvijek napustio Salkan Džananović iz Petrovica Gornjih. Član Društva je od 1976., a počasnim članom je proglašen 2001. godine. Njegovom smrću Društvo je izgubilo izuzetnog aktivistu, plemenitog čovjeka i prijatelja.

LD „Spreča“ Kalesija

SAVEZ LOVAČKIH DRUŠTAVA TUZLANSKOG KANTONA

OPERATIVNI KALENDAR AKTIVNOSTI U LOVIŠTIMA TK

ZA LOVNU 2013./2014. GODINU

I ČIŠĆENJE LOVIŠTA OD ŠTETOČINA

1. REDUKCIJA BROJNOG STANJA PASA I MAČAKA KOJI SE NEKONTROLISANO KREĆU PO LOVIŠTIMA (LUTALICE)

- juni2, 9, 16, 23, 30
- juli7, 14, 21, 28
- avgust4, 11, 18, 25
- septembar1, 8, 15, 22, 29

Redukciju brojnosti pasa i mačaka koji se nekontrolisano kreću po lovištima obavezno je obavljati i u sve lovne dane predviđene Operativnim kalendarom aktivnosti.

U slučaju nabavke i vještačkog unosa divljači u lovište, obaveza je da se prethodno izvrši uklanjanje svih pasa i mačaka koji se nekontrolisano kreću po lovištima, i ostalih štetočina i izvan utvrđenih dana, uz odluku lovačkog društva koja se mora dostaviti Savezu lovačkih društava Tuzlanskog kantona.

Redukciju brojnog stanja pasa i mačaka koji se nekontrolisano kreću po lovištima, vršiti u skladu s članom 13. Zakona o zaštiti i dobiti životinja.

Lovočuvari su obavezni da vrše redukciju brojnosti pasa i mačaka koji se nekontrolisano kreću po lovištima svaki dan, na način kako je to propisano Zakonom.

2. ODSTRJEL LISICA I DIVLJIH MAČAKA

- oktobar13, 20, 27
- novembar3, 10, 17, 24, 25
- decembar1, 18, 15, 22, 29
- januar 2014.....1, 2, 5, 12, 19, 26
- februar 2014.2, 9

Ove aktivnosti izvoditi isključivo nedjeljom. Poslije 5. januara je dozvoljen lov lisica i divljih mačaka, ali bez korištenja lovačkih pasa.

II LOV LOVOSTAJEM ZAŠTIĆENE DIVLJAČI

1. LOV SRNEĆE DIVLJAČI

Na osnovu prijedloga članica Saveza i Savjeta za lovstvo, preporučuje se odstrjel (mužjaka) sanitarnog i uzgojnog karaktera:

- juni8, 9, 22, 23
- juli6, 7, 20, 21
- avgust.....3, 4, 17, 18, 31
- septembar1, 7, 8

Napomena: Izlaske na srnaće organizovati: 8. i 22. juna, 6. i 20. jula, 3. i 17. i 31. avgusta i 7. septembra (subote u večernjem izlasku), a 9. i 23. juna, 7. i 21. jula, 4. i 18. avgusta i 1. i 8. septembra (nedjelje u jutarnjem izlasku).

Subotom je dozvoljen ulazak u lovište poslije 16 sati, a nedjeljom do 12 sati.

SRNE ŽENKE (sanitarno-uzgojni odstrjel):

Lovačka društva, radi postizanja optimalne trofejne vrijednosti i održavanja zdrave populacije srneće divljači, imaju obavezu organizovati sanitarno-uzgojni odstrjel ženki i lanadi srneće divljači u periodu od 1. oktobra 2013. godine do 31. januara 2014. godine.

Ovaj lov organizovati isključivo po odluci članica Saveza, uz obavezu dostavljanja odluke SLD TK.

2. LOV DIVLJIH SVINJA

- oktobar13, 10, 27
- novembar3, 10, 17, 24, 25
- decembar1, 8, 15, 22, 29
- januar 2014 (vepar i nazime)1, 2, 5, 12, 19, 26

- februar 2014 (vepar i nazime)2, 9
Vepra je dozvoljeno odstrjeliti u sve lovne dane tokom godine predviđene Operativnim kalendarom.

Poslije 5. januara je zabranjen lov sa psima bez obzira na vrstu i rasu.

Ovu aktivnost obavljati po grupama od po 10 lovaca, u koji broj ne ulaze pripravnici i gosti, s tim da je svaki član (pripravnik, redovni ili počasni član) bez obzira na status, dužan uplatiti ulaznu taksu od 1,00 KM. Ulazna taksa za gosta iznosi 10,00 KM.

Visinu ulazne takse za lovce goste koji dolaze iz lovačkih društava koja nisu članica SLD TK, određuju članice Saveza svojim odlukama, a visina ulazne takse ne može biti manja od 10,00 KM.

Lov divljih svinja vršiti u skladu s Operativnim kalendarom; u januaru i februaru 2014. godine dozvoljen je odstrjel samo vepra i nazimadi.

Za eventualni odstrjel krmače, mimo Operativnog kalendara, lovačka društva su dužna da naplate odstrjel prema odštetnom cjenovniku.

U slučaju odstrjela, grupa je dužna izvršiti uplatu na ime odstrjelne takse, bez obzira na zdravstveno stanje ulova.

Upozoravaju se lovačka društva da su obavezna izvršiti ljekarski pregled svake ulovljene divlje svinje, a pregled platiti od sredstava odstrjelne takse.

3. LOV ZEČEVA

- oktobar13, 27
- novembar10, 24, 25
- decembar1, 15, 29

4. LOV FAZANA

- oktobar13, 20, 27
- novembar3, 10, 17, 24, 25
- decembar1, 8, 15, 22, 29

Lov fazanske divljači mogu planirati lovačka društva koja su u svoja lovišta unijela ovu vrstu divljači, i to u dane kako je navedeno u Operativnom kalendaru aktivnosti. Ovu vrstu divljači loviti isključivo sa psima pričarima.

5. LOV KUNA I VUKOVA

- oktobar13, 20, 27
- novembar3, 10, 17, 24, 25
- decembar1, 8, 15, 22, 29
- januar 2014.1, 2, 5, 12, 19, 26

Vukove mužjake je dozvoljeno odstrjeliti u sve lovne dane predviđene Operativnim kalendarom.

6. LOV MEDVJEDA

Lov na medvjede se praktikuje samo ako se ukaže potreba za komercijalni lov u Pravilnikom određeno vrijeme od 1. 4. do 15. 5. 2013. i od 1. 10. do 31. 12. 2013. godine i od 1. 3. do 31. 3. 2014. godine, po jedan primjerak, u LD „Sokolina“ Kladanj i LD „Zelemboj“ Banovići, uz obavezu da se odstrjel prijavi Savezu.

U slučaju potrebe i mogućnosti, u skladu s Pravilnikom o lovu i lovostajem zaštićene divljači, lovačka društva „Sokolina“ Kladanj i „Zelemboj“ Banovići mogu organizovati komercijalni lov ove divljači u periodu od 15. 5. 2014. godine.

7. LOV TETRIJEBA

Redovni lov dva dana u maju 2013. godine, a ukoliko postoje uslovi lov obavljati od 27. 4. do 31. 5. 2013. i od 15. 3. do 31. 3. 2014. godine, u skladu s utvrđenim brojnim stanjem u lovištu, uz obavezu da se odstrjel prijavi Savezu.

U slučaju potrebe i mogućnosti, u skladu s Pravilnikom o lovu i lovostajem zaštićene divljači, lovačka društva „Sokolina“ Kladanj i „Zelemboj“ Banovići mogu organizovati komercijalni lov ove divljači u periodu do 20. 5. 2014. godine.

8. LOV DIVOKOZA

Samo komercijalni lov dvije jedinke i jedna za lovačko društvo od 1. 9. do 31. 12. 2013. godine.

9. LOV DIVLJIH PATAKA, GUSAKA I CRNIH LISKI

Divlje patke loviti u periodu od 1. 9. 2013. do 23. 2. 2014. godine, samo nedjeljom i radnim danom koje odredi lovačko društvo – korisnik lovišta. Guske i crne liske loviti u periodu od 1. 9. 2013. do 26. 1. 2014. godine, i to na jezerima Modrac, Sniježnica i drugim manjim vodenim površinama, u skladu sa Zakonom o lovstvu.

Lovačka društva koja nemaju jezera mogu loviti ovu vrstu divljači na rijekama i na drugim vodenim površinama, isključivo nedjeljom.

10. LOV PREPELICA I GOLUBOVA GRIVNJAŠA

Lov prepelica i golubova grivnjaša obavljati u periodu od 1. 8. do 26. 12. 2013. godine.

11. LOV ŠLJUKA

Ova vrstu divljači može se loviti u periodu od 4. 8. 2013. do 23. 2. 2014. godine.

III NAPOMENA

Lovačka društva su dužna da kod organizacije lova i određivanja visine odstrjelne takse koja je određena cjenovnikom, primjene član 62. Zakona o lovstvu i Cjenovnik odstrjela i korištenja divljači i drugih usluga u lovištu („Službene novine Federacije BiH“, broj 12/09.)

IV UPOZORENJE

1. Upozoravaju se lovačka društva da je, u periodu od 5. 1. do 31. 7., zabranjeno izvođenje lovnih pasa u lovišta, bez obzira na vrstu, rasu i eventualnu specijalnost.

2. Upozoravaju se sva lovačka društva da se prilikom obavljanja lova striktno pridržavaju zakonskih propisa u pogledu dozvoljenog naoružanja kojim se lovi, kao i obilježja koja nose učesnici lova, a sve u cilju poštivanja zakonskih propisa i izbjegavanja neželjenih posljedica.

3. Sva lovačka društva su obavezna da imaju minimalno jednog lovačkog psa KRVOSLJEDNIKA, radi praćenja krvnog traga.

4. Sva lovačka društva su obavezna da tokom lovne sezone vode sve propisane evidencije, a naročito evidencije iz kojih se može utvrditi brojnost divljači u lovištima.

5. Operativni kalendar aktivnosti u lovištima Tuzlanskog kantona za lovnju 2013./14. godinu je okviran, a sve članice Saveza su dužne uraditi svoj kalendar aktivnosti za lovnju 2013./14. godinu, a koji ne može izlaziti iz okvira Operativnog kalendara aktivnosti SLD TK.

6. Sva lovačka društva su obavezna da, kod organizacije lova i gazdovanja lovištima, primjenjuju Zakon o lovstvu i podzakonska akta, ukoliko nisu u suprotnosti s istim, kao i druge zakonske propise koji definišu oblast lovstva ili se nje tiču.

7. U slučaju potrebe, zbog pričinjavnja šteta, lovačka društva mogu donijeti odluku o određivanju dana za progone crne divljači, koja će vremenski biti u skladu s Pravilnikom o vremenu lova lovostajem zaštićene divljači.